

2 Samuel

¿Pitaj rasunpaga Israelcunapa raynin? ¿Pinataj Davidpa ruquin ray canga?

¿Imataj caycan cay librucho? Cay librucho willacuycan 1 Samuel librupita aywaj willapallatami. Cay libruchoğa Davidpämi mas parlan. Paypämi Israelcunaga niran waquin raycunapita mas alli ray cashanta.

Rimir caj particho willaycämanchi imanöpa David llapan Israelcunapa raynin cayman chayashantami. Paymi chunca ishcaj tribucunata juclacharan. Contrancuna munaynincho chararaycashan particunatapis shuntaran (1–8). Mas alli caj willapa caycan capítulo 7. Chaychömi Tayta Dios niycan Davidpita mirajllana «imaycamapis» ray cananpaj (7.15–16).

Chaypitanaga cay librucho niycan David wañuptin pi ruquin cananpäpis cashantami (9–24). Samuel manana captin Israelchöga profëtaçuna caran Natán y Gad. Profëtaçunataga Tayta Diosmi cachamuran Tayta Dios munashannöna cawanapan rayta willananpaj. Profëtam willaran Tayta Diosta wiyacunanpaj, Tayta Diospa laynincuna nishanta, yachachishancunata cumlinanpaj. Chaynöpami raycunapa y profëtaçunapa willapanga chay timpullacho caran.

Saúl wañushanta David mayashan

1 ¹Saúl wañushanpita^a Davidga Amalec runacunata binsiycur cuticurcan Siclagman.^b Chaycho ishcaj junaj goyaran. ²Warannin junäga Saulpa suldäruncunapita chayaran juc runa, fiyupa llaquicuywan röpanpis pasaypa rachir-ushasha, umanpis allpalla. David cajman chayaycorga rispishapan gongurpacuran.

³Chaura tapuran: «¿Maypitataj chayaycämunqui?» nir.

Chaura niran: «Ichicllapami gueshpiycamushcä Israel suldärucuna pachacarashanpita.»

⁴Chaura David niran: «¿Imataj casha? ¿Llapanta willamay ari!»

Niptin chay runa niran: «Israelcunami pillyapita gueshpir aywacusha. Paycunaga achcami wañusha. ¿Saulpis wamran Jonatanpis wañusha!»

⁵Willajta Davidga tapuran: «¿Imanöpataj musyanqui Saulpis Jonatanpis wañushanta?» nir.

⁶Chay runa niran: «Nogaga puriyca-shächo mana yarpashapita camacarä

Gilboa jircaman. Chaychömi ricashcä Saultaga lansanman tuncacuycajta. Filistea runacunaga carrëtanwan y cawallun muntasha cajcuna jananchöna caycaran. ⁷Chay öra Saulga ticrarcur ricäramar gayamaran. Chaura noga aywashcä. ⁸Nircur «¿Pitaj canqui?» nimiran. Chaura noga willarä Amalec runa cashäta. ⁹Payga nimiran «Cayman shamuy. Juclla wañurachimay». Payga wañuy-carannami. Yangallanami cawaycaran. ¹⁰Chaymi ñaupnanman witiycur wañuycachishcä. Yamajna caycajta ricar manami yarpashcänachu cawanantaga. Nircorga gamman apamunäpämi corönanta, brasalëtata jorgucurishcä tayta.»^c

¹¹Chauraga Davidpis, yan'guincunapis fiyupa llaquicuyppita röpancunatapis rachir-usharan. ¹²Fiyupa wagan Saúl wañushanpita, Jonatán wañushanpita, Israel suldärucuna pillyacho pirdishanpita. Chaymi goyarpoj ayunaran.

¹³Chaypita Davidga willaj mösuta tapuran: «¿Gamga may runataj canqui?» nir.

^a1.1 1Sam. 31. ^b1.1 1Sam. 30. ^c1.6–10 1Sam. 31.1–6; 1Crón. 10.1–6.

Chaura chay runa niran: «Nogaga cä Amalec nasyunpitami. Lagacamushcämi» nir.

¹⁴Davidga sinchipa niran: «Gamga çimanirtaj wañuchishcanqui TAYTA DIOS acrashan rayta?»

¹⁵Nircur yanguinta gayarcu niran: «¡Canan öra wañurachiy!»

Chaura Amalec runataga wañojpaj tucsiycuran.

¹⁶Davidna niran: «Quiquiquimi juchayöga canqui wañunayquipaj. Quiquiquimi willacushcanqui TAYTA DIOS acrashan rayta wañuchishayquita.»

Saulpäwan Jonatanpaj David llaquicushan

¹⁷Saúl wamran Jonatanwan wañushanpita Davidga fiyupa llaquicur cantaran. ¹⁸Chay nishanta Judá runacunata yachachinanpaj niran. Llaquicur cantashanga isquirbiraycan Jaser libruhömi.^d Cantar niran:

¹⁹«¡Ay Israel, jircayquicunachömi alli caycajta ima-aycayquicunatapis illgächisha!
¡Fiyupami binsiycusha pilliyay yachajcunataga!

²⁰Filístea warmicuna mana cushicunapaj,
juchasapa warmicuna cushicuy-pita mana pinticachänanpaj
Gat siudächo ama rimacuchunchu.^e

Ascalonpa cällincunachöpis ama willacuychu.

²¹«¡Gilboa jirca, cananpitaga amana gamman imaypis tamyamuchunnachu!
¡Ni shullaypis yurichunchu!
Gamga canqui wañushacuna jitaränan pampami.
Chaychömi pilliyay yachajcuna charashan

escüdunpis lluchcar-ushasha casha.
Chaychömi Saulpa chapacuna escüdunpis asétin pishiptin mana chillapyashanachu.

²²Jonatanpa lëchanga yawartarämi jorgurej.

Saulpa espädanga aychatarämi rachirej.

Paycunaga ollgojcunatami wañurgärachej.

²³«Saultawan Jonatantaga runacuna amatarmi cuyaran.

Paycunaga manami raquicashachu cawarpis ni wañurpis.

¡Ancacunapitapis masmi cörrej!
¡Liyuncunapitapis mas sinchimi caj!

²⁴¡Israel warmicuna fiyupa wagay Saulpäga!

Payga linupita, murädu tëlápita röpata jatico.

Gorinpawan burdasha cuyayllapajcunata jatico.

²⁵«¡Imanöshi pilliyashan jircacho binsiycusha pilliyay yachajcunataga!

¡Jonatanpis wañusha altu jircahömi!

²⁶¡Jonatán, gampäga fiyupami llaquicuycä.

Gamwanga fiyupami yachänacuranchi!

¡Fiyupami cuyamarayqui!
Warmicunapa shongunpitaga

mas alli shongumi cashcanqui.

²⁷¡Imanöshi binsiycusha pilliyay yachajcunataga!

¡Armanacunapis ushacashami!»

Judäpa raynin cananpaj Davidta churashan

2 ¹Chaypita Davidga TAYTA DIOSTA tapucuran: «Tayta, Judächo caj siudäcunaman çimaygallanmanga aywämanchu?» nir.

^d1.18 Jos. 10.13. ^e1.20 Miq. 1.10.

Chaura TAYTA DIOS niran: «Au, ayway ari.»

Niptin David tapuran: «¿Maygan siudámantaj aywáman?» nir.

Tayta Diosna niran: «Hebronman ayway.»

²Chaura David aywacuran ishcan warminwan: Jezreelpita caj Ahinoamwan, Carmelpita caj Abigailwan. Abigailga caran Nabalpa biyüdan.^f ³Llapan yan'guincunatapis pushacuran warminta wamrancunatawan-cama. Chayar tiyacaycäri-ran Hebroncho caycaj marcacuna-man. ⁴Judá runacunaga chayaycäri-r Davidta churaran paycunapa raynin cananpaj.

Davidta willaran Galaadcho caycaj Jabes runacuna Saulta pampashanta.^g

⁵Chaymi Jabes runacunaman cachacuran: «TAYTA DIOS bindi-syunta goycärishunqui mandaj-niqui Saulta cuyapashpayqui alli pampaycärishayquipita. ⁶TAYTA DIOSPIS gamcunata cuyapar alli ricaycärishunqui. Noga quiquëpis allimi ricashayquipaj allita rurashay-quipitaga. ⁷Canan ichanga gamcuna sumaj balurchay. Saúl wañusha captinpis Judá runacuna nogatanami churamasha raynin canäpaj.»

Israelcuna y Judá castacuna guërracho cashan

⁸Abnermi ichanga Saulpa wamran Is-boset-tana ray cananpaj churaran Mahanaimman pusharcu. Abnerga caran Nerpa wamran, Saulpa mandaj suldärün. ⁹Chaura Is-bosetga ray car mandaran Galaadta, Gesurita, Jezreelta, Efrainta, Benjaminta, llapan Israel nasyunta. ¹⁰Israelpa raynin cayta gallaycushan öra Is-boset caycaran chuscun chunca (40) watayoj. Ishcay wata llapanpa raynin caran. Judá runacunami ichanga «rayninchí»

niran Davidta. ¹¹Chaynöpami Davidga Judá cajcunallapa raynin caran ganchis wata sojta quillan. Mandar tiyaran Hebroncho.

¹²Chaypita Abnerga Mahanaimpita aywar chayaran Gabaonman, Saulpa wamran Is-bosetpa suldäruncunawan.

¹³Sarviapa wamran Joabpis Davidpa suldäruncunawan Hebronpita aywaran. Ishcan tincupuraran Gabaoncho yacu ishtanqui cajcho. Joab pusharashan suldärucuna caycaran ishtan-quipa jucaj-läduncho. Abner pusharashan caj suldärucunana caycaran ishtanquipa jucaj-läduncho. ¹⁴Abnerga Joabta niran: «Ishcanchipita mösucuna llojshimuchun ñaupanchicho pillyanapaj. Mä ¿mayganshi binsenga?»

Chaura Joabga «Yä» niran.

¹⁵Chaura Is-bosetpa suldäruncuna llojshiran chunca ishca (12) mösucuna ñaupaman. Davidpa suldäruncunapis chunca ishca (12) llojshiran. ¹⁶Nircur cada-ünun contrancunawan umapita-cama charinacur sablinwan tucsinacuriran. Chaura jinan öra llapan wañuran. Chaypitami Gabaoncho caycaj partipaga jutin caran Helcat-hazurim.

¹⁷Chauraga chay junaj ishcan röpa fiyupa pillyaran. Aypalla runa wañuran. Abnertawan Israelcunataga Davidpa suldäruncuna binsiran. ¹⁸Davidpa cajcho carcaycaran Sarviapa quimsan wamrancuna Joab, Abisai, Asael. Asaelga fiyupa cörrej lluychu jäcoj jircapa cörrejñöraj. ¹⁹Paymi Abnerta mana cachaypa gaticurcur aywaran.

²⁰Gaticachaycaptin Abnerga ticrarcur niran: «Gamga Asaelchaj canqui ari.»

Chaura Asaelga niran: «Chaura pitaj cashäga.»

²¹Chaymi Abnerga niran: «Nogata-ga ama gaticachämaynachu.»

^f2.2 1Sam. 25.42–43. ^g2.4 1Sam. 31.11–13.

Mayganwanpis mösu-masillayquiwan charinacuyga. Imancunatapís guechurcur apacuy.»

Niptinpis Asaelga jinalla gatiycaran.

²²Chaura Abnerga yapay niran: «¡Ama gaticachämaychu! Wañuchinätachu munanquipis. Gamta wañurcacherga ¿ima nishätaj wauguiqui Joabtaga?»

²³Asael mana cachariyta munap-tin Abnerga lansanpa guepa caj puntanwan pachacho tucsiycuran wajtanpa päsaramunanyaj. Chaura jinan öra Asaelga pampaman tuniran. Chayllachönami wañuranpis. Asael wañushanman chayaycorga aywaj-cuna lllapanmi ichiycoj ricananpaj. ²⁴Chaypis Joabwan Abisaiga jinalla gaticachaycaran Abnerta. Inti yaga-curcuptin chayaran Gabaonpita näni aywaj Ama lömaman. Chayga caran Gía parti chunyajcho. ²⁵Chaycho Benjamín runacuna Abnerwan shuntacaran. Nircorga quiquin puntacho camaricurán.

²⁶Chaypita Abner gayacuran Joabta: «¿Manachu imaypis cay wañuchinacuyga chawanga? Gamga ¿manachu yarpanqui wañuchinacuyga llaquicuymán churamänanchïta? ¿Imay örataj suldäruyquicunata ninqui runa-masincunata manana gaticachänanpaj?» nir.

²⁷Chaura Joab niran: «Nogaga Diosninchïpa jutincho jurä. Tutalla rimacuptiquega canan öra manami suldärucuna gaticachäshunquimanchu caran. Manami imapis canmanchu caran.»

²⁸Chayno nircur jinan öra Joabga niran trompëtancunata tucananpaj. Chaura lllapan runacuna jinancho ichicaycäriaran. Manana gaticacharannachu IsraeLCunata. Manana pilyarannapischu. ²⁹Abnerga aywäshej runacunawan aywacuran Arabá pampallapa warayllata. Nänicunatapís dirichaycärir aywacur Jordanpa,

Bitronpa päsashpan Mahanaimman chayaran.

³⁰Joab Abnerta

gaticachaycashanpita cachaycäriaran. Nircur lllapan suldäruncunata shuntaran. Yupanacuptin Davidpa mandaj suldäruncuna wañuran chunca isgunin (19) Asaelta mana yupayllapa.

³¹Davidpa suldäruncunami ichanga wañuycärichiran quimsa pachac sojta chuncan (360) runacunata Abnerwan aywaj Benjamín runacunata.

³²Asaelpa cuerpunta aparan Belenman. Chaychöga pampaycäriaran papänin pamparashan uchullaman. Chay chacaylla Joab lllapan suldäruncunawan Hebronman aywacuran. Chaychöna pachataga warämuran.

3 ¹Chayno unaycamami pilyaran Saulpa faburnin cajcunawan Davidpa faburnin cajcunaga. Davidpa cajcunaga mas achcayacaran. Saulpa cäga ushacaycaranna.

Davidpa wamrancuna


(1Crón. 3.1-4)

²Hebroncho tiyaycaptin Davidpa wamrancuna achca yuriran.

Guechpa caj wamranpa jutinmi caran Amnón. Payga Jezreelpita caj warmín Ahinoampa wamranmi caran.

³Nabalpa biyüdan Carmelpita caj Abigailcho caran Quileab.

Gesurpa raynin Talmaipa wamran Maacacho caran Absalón.



Hebrón siudä (2Sam. 3.2)

⁴Haguitcho caj wamran caran Adonías.

Abitalcho caj wamran caran Sefatías.

⁵Eglacho caj wamran caran Itream. Paypis caran Davidpa warminmi.

Chaycunami Davidpa wamrancuna yuriran mayurpita shullcacama Hebroncho tiyaycaptin.

**Abner Davidwan
amistáta rurashan**

⁶Chaynöllami pilyyaga caycaran Saulpa faburnin cajcunawan Davidpa faburnin cajcuna. Saulpa cajchöga

Abnertana runacuna mas alli ricaran.

⁷Saulpami Rizpa jutijoj warmi chinan caran. Chay caran Ajapa wamran.

Juc cuti Saulpa wamran Is-bosetga Abnerta niran: «¿Imanirtaj papänëpa chinanwan cacushcanqui?»

⁸Chaura Abnerga fiyupa rabyacurcur Is-boset-ta niran: «¡Nogaga manacaj allgutächu cá Judächöga! Canancamapis allimi goyashcä papäniqui Saulta sirbir. Famillyancunatapis, amistänincunatapis allimi ricashcä. Gamtapis manami Davidman entregashcächu. ¿Cananga gamrächu jusgamcanqui nir? ⁹Canan ichanga Davidta yanapähshaj TAYTA DIOS aunishan cumlinanpaj. Man'chäga Tayta Dios castigamächun. ¹⁰Tayta Dios aunisha Saúl casta mandajcunata jitarinanpaj,^h Israelpawan Judäpa mandajnin Davidllana cananpaj. Chaura payllanami mandanga Danpita Beersebacama.»

¹¹Chaura Is-bosetga ni juc shimipis mana rimacuranchu Abnerta manchacushpan.

¹²Abnerga Davidwana alli ricnacuyta munar cachacuran «Sumaj parlacushun. Nogami llapan Israelcunata shacyächishaj gamllatana rayninpa ricashunayquipaj» nir.

¹³Davidna niran: «Nishayquino parlacushun ari. Ichanga shamunqui Saulpa wamran Micalta pushacurcur. Mana pushamorga ama chayamunquichu.» ¹⁴Is-bosetmanpis Davidga cachacuran «Warmi Micalta entregamay. Paytaga noga rucarä Filistea runacunapa pachac (100) pengayninpa punta garanwanmi.»ⁱ

¹⁵Chaura Is-bosetga cacharan Laispa wamran Paltielpa warminta guechoj.

¹⁶Apauptin Paltielga guepanta aywaran wagaraycar Bahurimcama. Chaychönami Abnerga «cuticuy» niran. Chaura Paltielga cuticuran.

¹⁷Chaypitaga Israel mayurcunata Abner niran: «Gamcunaga ñaupapitanami munarcaycashcanqui David rayniqui cananta. ¹⁸Cananga ray cananpaj churayna. TAYTA DIOSMI auniran «Sirbimajnë Davidtami yanapähshaj Israelcunata Filistea runacunapa munayninpita salbananpaj, llapan chiquejcunapita salbananpaj» nir.»

¹⁹Abnerga Benjamín runacunawanpis parlaran. Nircurmi Hebronman aywaran Israel runacuna, Benjamín runacuna imano yarpashantapis Davidta willaj. ²⁰David caycashan Hebronman chayaran ishcay chunca (20) runacunawan. Chaura Davidga alli micuyta rurachiran llapan shamojcunapaj.

²¹Abnerga Davidta niran: «Cananga aywacushäna llapan Israelcunata shuntaj gamwan parlacunanpaj. Chayrämi tayta, munashayquino mandanquipaj.»

Chaypita Davidga despacharan Abnerta. Chauraga allilla aywacuran.

Abnerta Joab wañuchishan

²²Joabwan Davidpa suldäruncunaga chay öraraj chayaramuran runacunata asaltaj aywashanpita. Ima-aycatapis

^h3.10 1Sam. 15.28. ⁱ3.14 1Sam. 18.27.

aypallata apamuran contranta asal-tashanta. Abnerga Hebronpita aywacushana caran David despatchariptin. ²³Llapan suldäruncunawan Joab chayaptin willaran Nerpa wamran Abner raywan parlacurir aywacushanta. ²⁴Chaura Joabga raywan parlaj aywar niran: «Tayta ray, ¿imataj rurashcanqui? Abner shamusha caycaptin ¿imanirtaj aywacunanpaj cachaycushcanqui? ²⁵Tayta, gam ¿manachu musyanqui Nerpa wamran Abnerga engañashunayquipaj shamushanta? Payga shamusha imallata rurashayquitapis, mayllapa purishayquitapis musyapacojmi.»

²⁶Davidwan parlashanpita llojshirir Joabga jinan öra cacharan Abnerta ashej. Chayta Davidga mana musyaranachu. Aywaj runacuna Abnerta cutichimuran Sira particho yacu pösu caycaypitana. ²⁷Hebronman Abnerta chayacachiptin Joabga aparan siudäman yaucuna puncupita juc-läduman ishcallan parlanapaj. Chaychöga wauguin Asaelta wañuchishanpita Joab wañojpaj pachapa tucsiycuran.

²⁸David musyaycur niran: «Nerpa wamran Abnerta wañuchishanpitaga nogapis ni mandashä nasyun runacunapis juchaynajmi. Chaytaga TAYTA DIOSPIS musyanmi. ²⁹Castiguga chayachun Joabman, llapan familiyancunatawan. Paycunaga gueshyanga purgasyunwan, leprawan. Pay familyaga wegru cachun. Guërracho wañuchun. Muchupacajlla cachun.»

³⁰Joabwan Abisaiga wañuchiran Abnerta, Gabaón pillyacho wauguinta Abner wañuchishanpitami.

³¹Chaypita Joabta yan'guincunatawan David niran: «Röpayquicunata rachir ushay. Nircorga jaticunqui gachga röpata. Abner wañushanpita wagay.» Nircur ray Davidga ayata gitaran. ³²Abnerta pamparan Hebroncho. Pampashan puncucho ray Davidga fiyupa wagaran. Llapan runacunapis

wagaran. ³³Rayga llaquicuyupita cantaran:

«Abner ¿upata-jinachu wañuyca-chishurayqui?

³⁴Maquiquipis manami watarashachu.

Chaquiquipis manami manyarashachu.

¡Asaltantinömi wañuchishacashunqui!

Mala-muertipami wañushcanqui» nir.

Abnerpäga runacunapis jinalla wagarcaycaran. ³⁵Chaypitaga runacuna aywaran manaraj inti yagaptin micunanpaj Davidta ruwaj. Chaymi Davidga jurashpan niran: «¡Dios fiyupa castigamächun manaraj inti yagaptin tantata car, ima micuyta carpis micuptëga!»

³⁶Chauraga llapan runa tantiyacuran. Ray rurashanga llapanpäpis alli caran. ³⁷Chay junaj llapan Israelcuna tantiyacuran Nerpa wamran Abner wañushanpita rayga juchaynaj cashanta.

³⁸Chaypita rayga mandaj suldäruncunata niran: «Gamcuna musyashayquinöpis cananga Israelcho wañusha alli runa, mayur runami. ³⁹Chaymi nogaga, Dios acrashan ray caycashpäpis Sarviapa wamrancuna Joabta y Abisaitaga wañuchicoj captin manchacömi. ¡Chaypita TAYTA DIOS castigachun!»

Is-boset-ta wañuchishan

4 ¹Hebroncho Abner wañushanta mayaycur Saulpa wamran Is-bosetpaga balurpis mana caranachu. Llapan Israelcunapis fiyupa manchariran. ²Is-bosetwan caran ishcaj runacuna. Jucninpa jutin caran Baana, jucajpana Recab. Paycunaga caran asaltanticunapa mandajnin. Ishcan caran Beerot runa Rimonpa wamran. Benjamín tribupitami caran. Beerotcho tiyajcunata

«Benjamín tribupita» nir rejsej.

³Paycunaga Gitaimnaga gueshpír aywacuran. Chaychöga canancamapis lagacullarmi tiyarcaycan.

⁴Saulpa wamran Jonatanpa juc wamran caran.^j Chaypa jutín caran Mefi-boset. Paypa ishcan chaquin caran mancu.^k Mefi-boset pichga watayoj caycaptinmi Jezreelpita willacoj chayaran «Saulwan Jonatán wañusha» nir. Chaura wamra uywajnenga Mefi-boset-ta aparicurcur gueshpír aywacuran. Apurä aywaycashancho wamrata sajtaycuran. Chay cajllami chaquincuna mancuyacäcuran.

⁵Beerotcho tiyaj Rimonpa wamrancuna Recabwan Baanaga aywaran Is-bosetpa wasinman. Chayaran las-dösi inti fiyupa shanaycashan öra. Micuyta usharcur Is-boset puñuycaran. ⁶Wasi puncuta täpajpis rīguta wayraycashancho puñucäcusha caran. Chaynöpa mana pipis ricaylla Recabwan Baanaga yaycuran. ⁷Is-bosetga cämancho puñuycänaj. Chaura wañuycärachir umanta roguriycur apacuran. Nircorga Arabäman näni aywajpa warayllata aywaran. ⁸Is-bosetpa umanta aparán Hebroncho David caycashanman. Chayaycur Davidta niran: «Tayta ray, Saulpa wamran Is-bosetpa umantami apamushcä. Is-bosetga chiquishushpayqui wañuchiytami yarpapaycäshurayqui. Cananmi ichanga TAYTA DIOS camacächisha Saulpis wamrancunapis ushacänanpaj.»

⁹Chayno niptin David niran: «Ima llaquicuyacunapitapis salbamaj TAYTA DIOSPA jutinchömi nogaga jurä. ¹⁰Ñaupataga «Alli willapatami apaycä» nir nogaman chayaycamur Saúl wañushanta willamaran. Chayno willapämashanpitami präsu charircur

Siclagcho wañuchichirá.^l ¹¹¡Paypitaga mas fiyumi gamcuna canqui! ¡Juchaynaj runa wasincho puñuycaptinmi wañuchishcanqui! ¡Chaypitami cananga quiquiquita cay pachapitapis illgächishayqui!»

¹²Chayno nircur jinan öra Davidga «wañuchiy» niran mandaj suldäruncunata. Chaura paycuna wañurachiran. Maquinta chaquinta rogaran. Nircur warcuycuran Hebroncho yacu pösü lädunman. Chayno rurarcur Is-bosetpa umanta aparcärir pamparan jinan Hebronman, Abner pamparashan uchcullaman.

Judäpawan Israelpa David raynin cashan

5 ¹Chaypitaga llapan tribu Israelcuna aywaran Hebronman Davidwan parlanj. Davidta niran: «Nogacunapis cä yawar-masiquimi. ²Saúl raynë captinpis gammi Israelcunataga maypa aywaptinpis pusharaj canqui. Gamtami TAYTA DIOSPIS nishurayqui: «Gammi acrashä Israelcunata pusharanquipaj mandanquipaj» nir.»

³Chaynömi Israelcunapa llapan mandajnincuna aywaycärir Hebroncho ray Davidwan parlaran. Chaura Davidga paycunawan parlaran «TAYTA DIOSPIS wiyaycämanchimi» niran. Chaura paycunana asëtita wiñapashpan raynin cananpaj Davidta churaran. ⁴David caycaran quimsa chunca (30) watayoj ray cayta gallaycushan öra. Ray caran chuscuchunca (40) wata. ⁵Hebroncho goyar Judäcunallapa raynin caran ganchis wata medyan. Jerusalemcho goyarna Israelcunapawan Judäcunapa raynin caran quimsa chunca quimsan wata.^m

Sión siudäta David charishan (1Crón. 11.4–9)

⁶Ray Davidga munaynincho caj runacunawan aywaran Jerusalemman Jebüs

^j4.4 Raypa willcan cashpanmi paypis ray cayta chasquinan caran. ^k4.4 2Sam. 9.3.

^l4.10 2Sam. 1.1–16. ^m5.4–5 1Rey. 2.11; 1Crón. 3.4; 29.27.

runacunataⁿ magaj. Chaymi Jebús runacunaga siudáman David yaycunanta mana riguishpan niran: «Ganga manami cayman yaycamunquipáchu. Siudáman yaycamunayquitaga wegrucunallawan gapracunallanami ichipáshunqui.»⁷ Niycaptinmi Davidga Sión^o siudáta guechuran. Cananga Siontami «Davidpa siudänin» nin.⁸ Manaraj yaycurmi suldäruncunata David niran: «Gapracuna y wegrucunalla ichipáshunqui» nimajninchiacunataga pasaypami chiquë. Cananga paycunata magananchipaj yacu aywaj tünil-llapa chay marcaman yaycushun.» David chayno nishanpita-pachami imaypis nin: «Gapracunapis ni wegrucunapis Templuman ama yaycuchunchu.»⁹ Nircur Davidga chay siudácho tiyacucuran. Jutintana churaparan «Davidpa siudänin» nir. Pata chaquinpitapis pergata jatarachiran. Intëru cantunpa curalachiran.

Davidman Hiram cachacushan

¹⁰ Ima-aycapäpis munayniyoj TAYTA DIOS yanapaptinmi Davidga mas achcatana mandaycaran.¹¹ Chaymi Tiro nasyunpa raynin Hiram cachamuran ruqincunata Davidwan parlaj. Paycunawan cachamuran carpintërucunata, rumi lllagllajcunata. Aparan sedru guerucunata Davidpa palasyunta rurananpaj.¹² Chaura David tantiyacuriran Israelcunapa raynin cananpaj TAYTA DIOS rasunpa churashanta. Davidga tantiyacuran Israelcunata TAYTA DIOS cuyashpan payta mas alli yanapaycashanta.

Davidpa waquin wamrancuna

(1Crón. 3.5–9; 14.3–7)

¹³ Davidga Hebronpita Jerusalenman witicuran. Jerusalenchöna Davidga

majachacaran mas juc warmicunawan. Chünancunapis achca caran. Paycunacho wamrancuna caran ollgupis warmipis.¹⁴ Jerusalencho yurej wamrancuna caran Samúa, Sobab, Natán, Salomón,¹⁵ Ibhar, Elisúa, Nefeg, Jafía.¹⁶ Elisama, Eliada, Elifelet.

Filistea runacunata

David binsishan

(1Crón. 14.8–17)

¹⁷ Davidta Israelcuna raynin cananpaj churashanta musyaycur Filistea runacunaga chiquishpan ashej aywaran. Chayta mayaycur Davidga aywacuran pacacunanman.¹⁸ Chaura Filistea runacuna pachacuran Refaim pampacho.¹⁹ Chaymi Davidga TAYTA DIOSTA mañacur tapucuran: «¿Filistea runacunata magaj aywämanchu? Binsinäjaj ¿yanapämanquichu?» nir.

Chaura Tayta Dios niran: «Ayway. Yanapáshayquimi binsinayquipaj.»

²⁰ Davidpis aywar chayaran Baalperazimman. Chaychömi Filistea runacunata binsiran. Nircur niran: «Aypalla yacu aywajnömi TAYTA DIOSGA contrancunapa chaupinpa päsänäjaj camacächisha.» Chaypitami pillyashan partida jutichaparan Baalperazim^p nir.²¹ Filistea runacunaga iduluncunata cachariycur gueshpiran. Davidnami aywäshej runacunawan shuntaran.

²² Filistea runacunaga cutiyärir yapay tiyacaycärran Refaim pampacho.²³ Chaymi Davidga TAYTA DIOSTA yapay tapucuran.

TAYTA DIOSNA niran: «Ñaupanpaga ama yaycuychu. Guepanpa yaycuy. «Bálsamo» yöracuna caycashan cajman chayaycorga²⁴ mayanquipämi yöracunapa janpana runa aywaycajtano.

ⁿ 5.6 Jos. 15.63; Jue. 1.21. ^o 5.7 Siontami *Jerusalén* nejpis. Jerusalenpa läduncho caycaj lömatapis *Sión* nej. Chaychömi Tayta Diospa Templunta Salomón rurachiran.

^p 5.20 *Baal-perazim* ninanga *Taytanchimi yaycunanchipaj yanapämanchi* ninanmi.

Chaura jinan öra pillyaj yaycunqui. Chayga canga musyanayquipämi. Nogaga gamcunapa ñaupayquitami aywashaj Filistea runacunata wañuchinäjaj».

²⁵Davidga TAYTA DIOS nishanno ruraran. Chaynöpami Filistea runacunataga Gabaonpita Gezercama wañuchiran.

**Diospa babulninta
David witichishan**

(1Crón. 13.5–14)

6 ¹Chaypita yapaypis Davidga shuntaran Israel suldärucunata, quimsa chunca warangata (30,000). ²Chay suldäruncunawanmi Davidga aywaran Judächo caycaj Baalaman chaypita munayniyoj Tayta Diospa babulninta apacunanjaj. Querubín anjilcunapa chaupinchömi TAYTA DIOSPA jamanan caycan. ^{3–4}Mushoj carrëtaman Tayta Diospa babulninta churaran. Nircur Abinadabpa wasinpita aparan. Paypa wasenga caycaran puytush lömacho. ^rAbinadabpa wamrancuna Uzawan Ahionami Diospa babulninta apaptin ñaupaparan. Carrëtapa ñaupallanta aywaran Ahio. ⁵Davidpis lllapan Israelcunawan aywaran lllapan babulninta ñaupanta lllapan callpanwan cantashpan, pinticachashpan; arpacunata, arpano salteriota, panderëtata, shaj-shajyajcunata, latilluta tucashpan. ⁶Naconpa éranman chayar chutaj buyicuna tapricaran. Chaymi Uzaga Diospa babulninman aypacuran tucnananjaj. ⁷Tucnarcushanpita TAYTA DIOSGA rabyacurcuran. Chaymi jinan öra Uzata wañurachiran babulnin ñaupancho.

⁸Davidga fiyupa rabyaran Uzata TAYTA DIOS wañuchishanpita.

Chaypitami chay pachata jutichaparan «Pérez-uza»^s nir. Canancamapis chayllami jutin. ⁹Chay junaj Davidga TAYTA DIOSPA manchacushpan niran: «¡TAYTA DIOSPA babulninta wasëman manami apëmanchu!» ¹⁰Siudäninman TAYTA DIOSPA babulninta manana apayta munarannachu. Chaymi niran Obed-edompa wasillanman churananjaj. Chay runaga caran Gat runami. ¹¹Chaura TAYTA DIOSPA babulninta quimsa quilla cacuran Obed-edompa wasincho. TAYTA DIOSGA bindisyunta goran Obed-edomta, lllapan famillyancunata.^t

**Diospa babulninta
Jerusalemman David apashan**

(1Crón. 15.1–16.6)

¹²Chaypita ray Davidta willaran «Diospa babulnin Obed-edompa wasincho captin lllapan famillyancunata, ima-aycantapis TAYTA DIOS bindisyunta gosha» nir. Chaymi Tayta Diospa rabyaynin pásashanta tantiyacushpan Davidga aywaycur Tayta Diospa babulninta Davidpa siudäninman witichiran. ¹³Tayta Diospa babulninta apajcuna sojta japayta llojshircuptin Davidga sacrificisyupaj pishtaran juc töruta, juc wera carnita.

¹⁴Davidnami linu efod jatisha TAYTA DIOSPA babulninta ñaupanta aywaycaran cushicushpan gachwaraycar. ¹⁵Davidpis, lllapan Israelcunapis TAYTA DIOSPA babulninta aparaycaran fiyupa cushicuypita gaparpar, trompëtacunatapispis tucashpan.

¹⁶TAYTA DIOSPA babulninta Davidpa siudäninman chayachiptin Saulpa wamran Micalga bentänapa watgarcuran. Ray Davidta ricaran cushicur TAYTA DIOSPA babulninta ñaupancho pinticachaycajta. Chaymi Davidtaga shongullancho jamurparan.

^q6.2 Éxo. 25.18–22; 1Sam. 4.4; 1Rey. 6.23–28; Sal. 80.1; Isa. 37.16; Eze. 1.26–28.

^r6.3–4 1Sam. 7.1–2. ^s6.8 Pérez-uza ninanga Uzata castigashan ninanmi.

^t6.11 1Crón. 26.4–5.

¹⁷TAYTA DIOSPA babulninta apaycur churaran tolduman. Chaytaga David mayna rurachisha caran babul churarānanpaj. Chayman churaycur David jinan öra rupachina sacrificiyuta y alli goyaypita sacrificiyutapis TAYTA DIOSPAJ rupachiran. ¹⁸Llapan rurayta ushaycur, ima-aycapäpis munayniyoj TAYTA DIOSPA jutincho llapan runacunata bindisyunta goran. ¹⁹Nircur llapan chaycho caycaj Israel runacunataga ollguta, warmitapis aypuran juc tantata, pedäsu aychata, päsas tantatapis. Chaypitanaga llapan cuticuran wasinman-camana.

²⁰Davidpis wasinman cutiran famillyancunata bindisyunta gonanpaj.^u Saulpa wamran Micalga tariparcu runan Davidta ashlliran: «Uyway warmicunapa ñaupanchu galaypagalar pinticachar ¿allichu ray rura-sha?» nir.

²¹Chaura David niran: «Au rasunpami, nogaga gachwashcä, ichanga TAYTA DIOSPA ñaupanchömi. Nogataga TAYTA DIOSMI acramasha papäniquipa, llapan famillyayquicunapa ruquin Israelcunapa raynin canäpaj. Chaynöpami nogaga gachwashcä TAYTA DIOSPA ñaupanchu. ²²Cananpi-taga masrämi manacajno rurashäpis. Yarpashayquino manacajpis cashaj. Ichanga «uyway warmicuna» niycashayquirämi rispitamanga.»

²³Micalnami wañunancama wawata mana tariranchu.

Davidta bindisyunta gonanpaj

Tayta Dios aunishan

(1Crón. 17.1–27)

7 ¹Ray David tiyaycaran palasyuncho. Llapan contrancunapis mana rimapanānanpäna TAYTA DIOS camacächiran. ²Profëta Natanta David niran: «Ricashayquinöpis, nogapa palasyöga alli, sedru guerupitami.

Diospa babulnenga toldu rurillancho caycan.»

³Chaura Natán niran: «Imatapis ruray gam yarpashayquino ari. Gamtaga TAYTA DIOSMI imachöpis yanapaycāshunqui.»

⁴Chay chacayllami Natanta TAYTA DIOS niran:

⁵«Ayway sribimajné Davidman. Willanqui noga nishäta: «Manami gamchu rurapāmanquipaj tiyanä Templuta. ⁶Israelcunata Egiptupita jorgamushä junajpita-pacha manami goyashcächu templucunachöga. Imaypis purishcä toldullachömi. ⁷Juc Templuta sedru guerupita rurapāmanānpäga juezcunata imaypis manami nishcächu. Paycunataga Israelcunata mandanānpämi churarä.»

⁸«Chaymi sribimajné Davidta ninqui ima-aycapäpis munayniyoj TAYTA DIOS cayno nishäta: «Gamtaga nogami jorgushcä jircacho uyshata michiycajta. Nircurmi churashcä acrashä Israelcunapa raynin canayquipaj. ⁹Maypa aywaptiquipis yan'gashcä. Llapan chiquishojcunatapis ushajpaj illgächishcä. Nogami yanapashcä cay munducho caj munayniyojcunano rejsisha canayquipaj. ¹⁰Camarishcä juc pachata acrashä Israel runacunapäpis. Quiquinpachöna tiyananpaj churashcä. Chaychöga manami pipis rimapangachu. Fiyu runacunapis manami ñaupatanöga ñacachengachu. ¹¹Cuyashä Israel runacunata unay magaran churashä juezcuna mandashan wichanpita-pachami. Chaynöllami gamtapis yanapāshayqui llapan contrayquicuna achäquita mana ashipāshunayquipaj. ¹²Gam wañuptiquinaga wamrayquitanami churashaj ray cananpaj. ¹³Paymi

^u6.19–20 1Crón. 16.43.

rupapämangapaj juc Templuta. Paypita mirajcunami imaycamapis mandangapaj. ¹⁴Nogami cashaj taytan. Paynami canga wamrâ. Imatapis mana allita ruraptenga castigashäpaj. Papänin wamranta castigashannömi castigashaj. ^v

¹⁵Ichanga cuyapähämi. Manami Saultanöchu rurashaj. Payta jitaricurmi gamtana ruquin churashcä.

¹⁶Chaymi gampita mirar aywajcunata imaypis yanapähaj raycuna cananpaj. >»^w

¹⁷Natanga Davidta willaparan imanöpis Tayta Dios musyachishanta.

¹⁸Chaura ray Davidga TAYTA DIOSPA ñaupanman yaycurcur niran:

«TAYTA DIOS, nogaga manacajllami cä. Familyläcunapis manacajllami. ¿Imanöpataj caycama chayachimanqui? ¹⁹¿Jananmanpis aunimashcanqui shamoj watacunacho nogapita mirajcuna munayniyoj cananpaj! ¿Manami ni pi runapis gamnöga ruranmanchu TAYTA DIOS!

²⁰«¿Imatanataj masta nëman? TAYTA DIOS, gamga musyaycanquimi imano cashätapis. ²¹Tayta, cuyamashpayquimi musyachimashcanqui llapan chay aunimashayquicunata cumlinayquipaj cashanta.

²²«¿TAYTA DIOS, gamga fiyupa munayniyojmi canqui! Gamnöga manami pipis canchu. Gampita mas juc diosga manami canchu. Manami wiyashcäcunapischu juc dioscuna cashantaga. ²³Acrashayqui Israel nasyunnöga manami juc canchu. Paycunallatami cay pachachöga acrashcanqui. Tayta Dios, gammi salbashcanqui acrashayqui runacuna cananpaj. Nircorga munayniyoj cayman churashcanqui quiquincunapa maquinwan milagrucunata rurashpayqui.

Egiptupita jorgamushayqui runacunapa ñaupanpita gammi jitarishcanqui waquin nasyun runacunataga diosnincunatawan. ²⁴Gammi camacähishcanqui Israelcunaga imaycamapis acrashayqui cananpaj; gam TAYTA DIOS, imaycamapis Diosnin canayquipaj.

²⁵«TAYTA DIOS, chauraga nogata, wamräcunata aunimashayquita ama gongaychu ari. Llapan nishayquita cumliycullay. ²⁶¿Gamga imaypis alabasha caycullay!

¿Munayniyoj TAYTA DIOSMI Israelcunapa Diosnenga!> nichun runacunapis. ¿Nogapita mirajcunapis yanapaptiquega allimi goyanga!

²⁷«Munayniyoj TAYTA DIOS gammi tantiyachimashcanqui nogapita mirar aywajcuna imaypis raycuna cananpaj cashanta. Chayno captinmi sirbishojniqui car chay aunimashayquita cumlinayquipaj mana manchaypa gamta mañacamö. ²⁸TAYTA DIOS, gamga canqui Diosmi. Gamga rasun cajllatami ninqui. Nogatapis aunimashcanqui cuyapämänayquipämi. ²⁹TAYTA DIOS cananga sirbishojniquipita mirajcunata bindsiyunta goycuy ari. Chaynöpami paycunaga imaycamapis maquiquicho canga. Gammi aunishcanqui. Bindsiyunniquiwanmi familyläcunaga imaycamapis alli goyanga-paj.»

David pillyashancuna

(1Crón. 18.1–13)

8 ¹Chaypitaga David pillyar binsiran Filistea runacunata. Filistea runacunata binsir Meteg-Ama siudätapis maquincho chararan. ²Moab nasyun runacunatapis binsiran. Paycunatami chojpayllapa pampaman lätachiran. Chay lätarayajcunatami

^v7.14 Deut. 8:5; 2Cor. 6:18; Heb. 1:5; 12:5–11. ^w7.11–16 1Rey. 2.4.

quimsa pachacho icsisha curdilwan tupuran. Ishcay pachacho icsisha cajman chayajta wañuchiran. Puchoj cajtana mana wañuchirancho. Chaynöpami Moab runacunaga ricacuran Davidpa munayninchöna. Paycunataga impuestutapis pägachiran.

³Davidga binsiran Rehobpa wamran Hadad-ezetapis. Payga caran Sobapa raynin. Hadad-ezetaga binsiran Éufrates mayu caj-lä partita shuntayta munaycaptin. ⁴Paycunata Davidga prësu chariran waranga ganchis pachacnin (1,700) cawallu muntädu purej suldärucunata, chaquipa purejtana ishcay chunca warangata (20,000). Carrëta garchaj cawallucunapa ancuncunatapis cuchurgärian. Pachac (100) carrëta garchananpaj cajllata cachaycuran.

⁵Davidwan pillyaptin Soba nasyunpa raynin Hadad-ezerta yanapananpaj Siria nasyunpita suldärucuna chayaran. Jina cajtami paycunatapis ishcay chunca ishcay waranga (22,000) suldärucunata wañuchiran.

⁶Nircurmi Davidga suldäruncunata churaran Damasco siudäta mandananpaj. Chaura Siria runacunaga Davidpa munayninchöna caycaran. Impuestutapis pägaranna. Chaynömi TAYTA DIOSGA Davidta yanapanan maypa aywashanchöpis binsinanpaj.

⁷Nircur Davidga guechuran goripita charashan chapacuna escüduncunatapis Hadad-ezerpa mandaj suldäruncunapata. Jerusalemman apacuran.

⁸Hadad-ezerpa siudänincuna Betacho Berotaicho aypalla runsin caycajtapis apacuran.

⁹Hamatpa raynin Toi mayaran David Hadad-ezerpa lllapan suldäruncunata binsishanta. ¹⁰Chaymi wamran Joramwan apachiran guellaypita, runsipita, goripita rurasha cösacunata Davidwan alli ricanacunanpaj.

«Hadad-ezerta allichömi binsish-canqui» niran. Toipis Hadad-ezerpa contran pillyanyaranmi. ¹¹Binsishan nasyuncunapita chasquishan guellayta goritaga ray David churaran TAYTA DIOSPÄMI. Toi apachishantapis Tayta Diospämi churaycuran. ¹²Chay shuntashancunami caran Siria nasyunpita, Moab nasyunpita, Amón nasyunpita, Filistea nasyunpita, Amalec runacunapita y Soba nasyunpa raynin Hadad-ezerpita.

¹³Davidga Cachi Pampacho Edom runacunata wañuchiran chunca pusaj warangata (18,000). Chaymi Davidpäga runacuna fiyupa almira-ran.* ¹⁴Nircur Davidga mandananpaj suldäruncunata churaran intëru Edom nasyunman. Chaura lllapan Edom runacunaga Davidpa munaynillanchöna caycaran. Maypapis aywaptin Davidtaga TAYTA DIOS yanapaj pitapis binsinanpaj.

Davidpa mandaj suldäruncuna
(2Sam. 20.23–26; 1Crón. 18.14–17)

¹⁵Davidga lllapan Israelcunapa raynin cashpan lllapanta iwalmi ricaran. Alli arreglata ruraj. Pitapis mana chapajchu. ¹⁶Lllapan suldärucunapa mas mandajnin caran Sarviapa wamran Joab. Ahiludpa wamran Josafatna caran raypa secretaryun. ¹⁷Ahitobpa wamran Sadoc y Abiatarpa wamran Ahimeleca caran cüracuna. Seraiasna caran actaman isquirbej. ¹⁸Joiadapa wamran Benaianami caran Ceret runacunapawan Pelet runacunapita mandajnin. Davidpa wamrancunana caran cüracuna.

Mefi-boset-ta David yanapashan

9 ¹Juc junaj Davidga tapuran: «Saulpita mirajcuna ¿caycan-rächuraj Jonatán-raycu yanapanapaj?» nir.* ²Juc runa caran Saulpa

famillyancunata sirbej. Jutin caran Siba. Chay runata willaran Davidman aywananpaj. Siba chayaptin rayga tapuran: «¿Gamchu canqui Siba?» nir.

Chaura Siba niran: «Nogallämi cä tayta.»

³Ray tapuran: «¿Caycanrächu Saulpa famillyancuna jucnayllapis? Caycaptinräga noga yanapashaj imallowanpis Tayta Diospa jutincho.»

Niptin Siba niran: «Au, caycanrämi jucnayllaga Jonatanpa wamran, ishcan chaquin wegru, puriyta mana puydej.»^z

⁴Chaura ray tapuran: «¿Maychötaj caycan?» nir.

Sibanami niran: «Lo-debarchömi, Amielpa wamran Maquirpa wasincho.»

⁵Chaura ray Davidga juella cacharan Lo-debarpita apamunanpaj. ⁶Mefi-boset caran Jonatanpa wamran, Saulpa willcan. Payga Davidman chayay fiyupa rispitaşpan umpuycuran.

Chaura Davidga «¿Mefi-bosetchu canqui?» niran.

Paynami niran: «Nogallämi cä tayta.»

⁷Niptin Davidga niran: «Ama manchacamaychu. Nogaga papäniqui Jonatanwan allimi ricanacurä. Chaymi gamtapis alli ricashayqui. Micur upur iwal goyashun. Chachayqui Saulpa chacrancunatapis cutichishunquimi.»

⁸Chaura Mefi-bosetga umpuycur niran: «Nogataga ¿imanirtaj fiyupa cuyapämanqui? Nogaga cä wañusha allgunömi.»

⁹Chaypispis rayga gayaran Saulpa unay sirbintin Sibata. Nircur niran: «Patrunniqui Saulpataga quiquinpatapis famillyancunapatapis willcan Mefi-boset-tanami cutiycachishcä.

¹⁰Chaymi cananga gam llapan

wamrayquiwan uywayniquicunawan arunqui payllapäna. Chayno chacracho wayushancunatapis churanqui patrunkiupa famillyancuna cawanpaj. Willcan Mefi-boset ichanga nogawan iwal miconga.»

Sibaga caran chunca pichga (15) wamrayoj, ishcaychunca (20) uywayniyoj. ¹¹Paymi niran: «Tayta, nogaga llapan nimashayquitami rurashaj.»

Mefi-bosetga raypa wasincho micoj wamran-japuy. ¹²Mefi-bosetpaga caran juc ollgu wamran. Jutin caran Micaía. Sibapa wasincho tiyajcunaga llapan sirbiran Mefi-bosetllatana.

¹³Ishcan chaquin wegru Mefi-bosetga tiyacuran Jerusalenllacho. Raywan iwal imaypis micoj.

Amón y Siria runacunata

David binsishan

(1Crón. 19.1-19)

10 ¹Chaypita mas unayllataga wañuran Amón runacunapa raynin Nahas. Chaura ruquin quëdaran wamran Hanunna. ²Davidga yarparan «Hanunpa papänin Nahas allimi ricamaran. Nogapis wamranta alli ricashaj» nir. Chayno yarparmi Davidga suldäruncunata cacharan Hanunta shogananpaj. Davidpa mandaj suldäruncuna Amón nasyunman chayaptin ³Amoncho mandajcunaga mandajnin Hanunta niran: «Tayta, ¿gam yarpanquichu, papäniqui wañushanpita shogashunallayquipaj David suldäruncunata cachamushanta? ¿Manami chaypächu canga! Shamusha canga imano cashantapis ricapacoj, siudäta tumapacoj, nircur illgächimänanchipaj.»

⁴Chaura Hanunga niran: «Davidpa suldäruncunata présu charircur shaprantapis pullanta garaypa rutuy. Röpatapis siqui-patanpita uraman rogupariy.» Chaura chayno rurarcärir

^z9.3 2Sam. 4.4.

garguriran. ⁵Suldäruncuna pasaypa pengacusha cutiyämushanta musyaycur Davidga runacunata cacharan shuyaj «Jericó marcallacho goyapäramuy shaprayqui wañanancama. Chaypitaraj cutimunqui» nir.

⁶Chayta rurariycur Amón runacunaga cuentata gocuran Davidta fiyupa rabyachishanta. Chaymi pägaypa pushamuran ishcaj chunca waranga (20,000) suldärucunata Siria nasyunpita, Bet-rehob partipita, Soba partipita. Maacapa raynin aywaran waranga (1,000) runacunawan. Chunca ishcaj waranga (12,000) aywaran Is-tob runacunapis. ⁷Chayta mayaycur Davidpis cacharan Joabta llapan suldäruncunatawan. ⁸Amón runacunaga aywar camaricurán pillyananpaj, siudäman yaucuna puncucho. Siriacho caycaj Soba, Rehob suldärucuna, Is-tob, Maaca suldärucuna jircacho camaricurán. ⁹Chaypita Joabga musyaran guepapita ñaupapita yaycapänanta. Chaymi acrarán mas allinnin Israel suldärucunata. Nircur camaricurán Siria runacunata ichipänanpaj. ¹⁰Nircorga waquin suldärucunata churaran wauguin Abisaipa munayninman Amón runacunata ichipänanpaj. ¹¹Nircur niran: «Siria runacunaga nogata binsimajnöna captenga shamunqui yanapämänayquipaj. Amón runacunaga gamta binsishojnöna cashuptiquega shamushaj yanapänäpaj. ¹²Ama manchacuychu. Tayta Diosninchiäpa marcancunaraycu, nasyunninchi-raycu pilliyashun mana manchacuypa. TAYTA DIOSGA yarpashanta camacächichun.»

¹³Joabga aywaran llapan suldäruncunawan Siria runacunata magaj. Chaura Siria runacunaga gueshpír aywacuran. ¹⁴Siria runacunaga gueshpjeta ricar Amón runacunapis Abisaipita gueshpír siudäman

yaycucaycäriran. Chaura Joab pilliyata cachaycur Jerusalemman cuticuran.

¹⁵Israelcuna binsishanta tantiyacurir Siria runacunaga yapay shuntacaran. ¹⁶Hadad-ezerga gayachiran Éufrates mayu wajtancho tiyaj Siria runacunata Helamman. Paycunapa ñaupantami aywaran Hadad-ezerpa mandaj suldärün Sobac. ¹⁷Aywaycashanta willaptin Davidga llapan Israelcunata shuntacurcur jinan öra aywaran. Jordán mayuta päsarir chayaran Helamman. Chaycho Siria runacunaga Davidwan tincupurar pilliyaran. ¹⁸Pillyaycashancho Israelcunapita gueshpíran. Davidga wañuycachiran chuscú chunca waranga (40,000) muntädu pilliyajcunata, pilliyapaj caj carrëtanwan cajtaga ganchis pachacta (700). Siriapa mandaj suldärün Sobac-tapis wañojpaj tucsiycurán. Chaura jinancho wañuran. ¹⁹Hadad-ezerta yanapajcunaga Israelcuna binsiptin manana masga rimaparannachu. Israelcunawanga allina goyaran. Israelcunapa munayninchöna caran. Chay junajpita-pacha Siria runacunaga fiyupana manchacuran Amón runacunata yanapayta.

David Betsabëwan cacushan

11 ¹Chaypita watataga custumrin cashanno raycuna pilliyaj llojshinan wichan Davidga cacharan Joabta, llapan mandaj suldäruncunata, Israel suldärucunata. Paycuna ushajpaj wañuchiran llapan Amón runacunata. Nircur Rabá siudäta curalacaycäriran. Davidga Jerusalemnita mana llojshirancho.^a

²Juc junaj tardipaypa puñushanpita jatarcur Davidga puricachaycaran wasin janancho. Niycashanchömi ricäriran cuyayllapaj warmi bänacuycajta. ³Pi cashantapis David

^a11.1 1Crón. 20.1.

tapucuptin willaran: «Eliampa wamran Betsabëmi. Het runa Uriaspa warminmi» nir. ⁴Chay warmiga quilla gueshyanpita limyu cananpaj chayraj bãñacuycaran. Davidga cacharan Betsabëta pushapënanpaj. Chay warmiwan cacuran. Nircur warmiga wasinman cuticuran.

⁵Warmiga gueshyaj ricacur Davidta willachiran. ⁶Chaura Davidga Joabman cachacuran «Het runa Uriasta cachamuy» nir. Joabga Uriasta cacharan. ⁷Chayaptin David tapuran «¿Imanõtaj caycan Joab y suldärucuna? ¿Imanõtaj caycan pillya?» nir. ⁸Nircorga niran: «Wasiquiman aywacuy. Jamapëramuy.»

Urias aywacuriptin rayga guepanta alli micuyta apachiran. ⁹Wasinman aywananpa ruquin Uriasga palasyu puncullacho wararan täpaj suldärucunawan iwal. ¹⁰Wasinman Urias mana aywashanta willaptin David tapuran: «Carupita shamusha caycarga ¿imanirtaj mana aywashcanquichu wasiquiman?» nir.

¹¹Niptin Urias niran: «Diospa rispitädu babulninpis, Israel, Judä suldärucunapis tiyaycan ramädacunallachömi. Mandajnë Joabpis, waquin suldärüyquicunapis jircallachömi puñurcaycan. ¿Chayno paycuna carcaycaptinchuraj nogaga wasëman aywaycur micurcur upurcur warmëwan cacushaj? ¡Ñaupayquichömi jurä. Chaytaga manami rura-shächu!»

¹²Chaura David niran: «Canan junäga goyëshunraj. Warami ichanga cutinquina.»

Chaynöpami Uriasga Jerusalencho goyaran warannin junajcama.

¹³Davidga iwal micunanpaj upunanpaj gayaran. Nircorga machächiran. Chacaymannaga Urias aywar puñucuycuran palasyuta täpaj suldärucuna

caycashallancho. Wasinmanga mana aywarancho.

¹⁴Warannin tuta Davidga cartata ruraran Joabman. Uriasllawan apachiran. ¹⁵Cartachöga niycaran: «Fiyupa pillya cashan cajcho Uriastaga churanqui ñaupapuntaman. Nircur quiquillanta cachaparinqui wañunanpaj.»

¹⁶Cartacho David chayno niptinmi Joabga Rabá marcaman magaj yaycushpan mas jinyuyo contran suldärucuna cashanman Uriasta pillyananpaj churaran. ¹⁷Siudäta täpaycajcuna illajpita llojshimuran Joabta ichipënanpaj. Pillyachöga juc ishca Davidpa mandaj suldäruncuna wañuran. Uriaspis wañuran.

¹⁸Joabga Davidman cartata apachiran imano pillya cashallantapis willar. ¹⁹Cacha aywajta sumaj yachachiran: «Pillya imano cashantapis llapanta willaycuptiquega ²⁰capachari rabyacurcur tapushunquimanpis ¿Imapätaj alläpa yaycurayqui perga chaquinyäga? ¿Gamcuna manachu musyashcanqui tapyapita imatapis jitarpamunanta? ²¹¿Tebes siudächöpis manachu Gedeonpa wamran Abimelecta juc warmilla wañuchiran? Wañuran perga janapita mulinurumi chayaptin. ^bChayta musyaycarga ¿imapätaj gamcuna tapyä ñaupanman yaycurayqui?» nir. Chaura gamga ninqui «Mandaj suldärüyqui Het runa Uriaspis wañushami.»

²²Cachaga David cajman chayaycur willaran llapanta Joab yachachishannölla. Chaura Davidga änr rabyacuycuran Joabpaj. [Chaymi cacha chayajta niran: «¿Imapätaj alläpa yaycurayqui perga chaquinyäga? ¿Gamcuna manachu musyashcanqui tapyapita imatapis jitarpamunanta? ¿Tebes siudächöpis manachu Gedeonpa wamran Abimelecta juc warmilla wañuchiran?

Wañuran perga jananpita mulinu rumi chayaptin. ¿Imapätaj gamcuna perga chaquincamaga yaycurayqui?»]

²³Chaura cachaga niran: «Nogacunataga pampaman llojshircamur suldärucuna gaticachaycämaramni. Nogacunapis ticrapur gatishcä siudä puncucama. ²⁴Chaychöna lëchata jitay yachajcuna perga jananpita suldäruyquicunata illapamuran. Juc ishcaj mandaj suldäruyquicunata wañuchisha. Het runa Uriastapis wañuchisha.»

²⁵Chaura Davidga cachata niran: «Joab ama yarpachacuchunchu. Pillyaga chaynömi. Cananga mas rabyawanraj siudäman yaucuchun llapanta illgächinanpaj. Gampis Joabta shacyächiy.»

²⁶Runan wañushanta mayaycur Uriaspa warmenga llaquicurán. ²⁷Llaquicushan päsaripitin Davidga cacharan Uriaspa biyüdanta pushapänanpaj. Palasyunman chayaptin majachacaran. Betsabëga Davidpata geshyacuran ollgu wamrata. David chayno rurashanga TAYTA DIOSPAJ mana allichu caran.

Davidta Natán piñacushan

12 ¹TAYTA DIOSGA David cajman cacharan profëtan Natanta.^c Natanga chayaycur Davidta niran: «David, juc siudächömi ishcaj runa tiyasha jucnin ricu, jucninna pobri. ²Ricupaga aypalla caran uyshapis, wäcapis. ³Pobripaga mana imanpis caranchu. Jucnaylla rantishan uyshamallwan caran. Uysha-mallwaga jatunyasha wasillancho quiquinwan wamrancunawan iwal. Iwal micusha. Chay pusillullapita yacutapis upoj. Mellgayllancho puñuchejpis. Chay runaga amatar cuyasha warmi wamrantanöraj. ⁴Chaypita juc cuticho ricu runamanga gorpan chaya-sha. Ricu runaga mana munaranchu

gorpanta garanapaj quiquinpa uyshanta, ni wäcantapis gastayta. Quiquinpata gastananpa ruquin pobri runapa uysha-mallwanta guechurcur micuyta rurasha gorpanta garanapaj.»

⁵Chaura Davidga chay runapaj fiyupa rabyacuycuran. Chaymi Natanta niran: «TAYTA DIOSPA jutinchömi jurä. Chayta rurajtaga pitapis wañuchinman. ⁶¡Mana cuyapaypa rurashanpita chay uysha-mallwanpa ruquinta cutichichun chuscuta!»

⁷Chaura Natanga niran: «¡Gammi chay runaga canqui! Israelcunapa TAYTA DIOSNENGA caynömi nisha: «Gamtaga acrashcä Israelcunapa raynin canayquipaj. Salbashcä Saúl wañuchishunayquipaj caycaptinpis. ⁸Saulpa ruquin ray canayquipäpis churashcä. Warmincunatapis munayniquiman churamushcä. Israeltawan Judätapis munayniquiman churashcä. Chaycuna pishiptenga mastami ima-aycatis yapäman caran. ⁹Willapashätaga ¿imanirtaj mana cäsushcanquichu? Mana munashätami rurashcanqui. Het runa Uriastami wañuchishcanqui Amón runacunapa maquinwan. Nircorga warminwanpis tiyacurcushcanqui. ¹⁰Het runa Uriaspa warminta warmiquipaj charicurcushpayqui manacajmanmi churamashcanqui. Chaypitami imaypis wasiquichöga wañuchinacuylla canga. ¹¹Noga nishäga rasunpami cumlenga. Quiquiquipa famillyayqui contrayqui jatarinanpämi camacächishaj. Llapan ricaymi famillyayquimanna warmiquicunata entregashaj. Paymi llapan ricay warmiquicunawan caconga. ¹²Gam pacayllapa rurasha captipipis nogaga llapan Israelcunapa ñaupancho junajpami camacächishaj.»^d

¹³Chaura Davidga jucha rurashanta tantiyacur Natanta niran: «TAYTA DIOSPA contranmi juchata rurashcä.»

^c12.1 Sal. 51. ^d12.11–12 2Sam. 16.22.

Natán niran: «Gamtaga manami juchayquipita TAYTA DIOS castiga-shunquipächu. Manami wañunquipäpischu. ¹⁴Ichanga TAYTA DIOSTA fiyupa rabyachishayquipitami chayraj yurisha wamrayqui wañonga.»

¹⁵Wasinman Natán cuticurip-tin Uriaspa warmincho caj Davidpa wamran fiyupa gueshyananpaj TAYTA DIOS camacächiran. ¹⁶Chaura Davidga wamranpaj amatarmi Diosta ruwacuran. Ayunaran. Waray-waray gala pampallacho puñuran. ¹⁷Wasincho tiyaj auquincuna aywaycur ruwaj jatarinanpaj. Ruwaptinpis mana munajchu. «Micushun» niptinpis mana munajchu.

¹⁸Chaypita ganchis junajtaga wamra wañuran. Chaymi mayur uywaynincunaga Davidta willayta manchacuran «Wamran cawaycaptin parlapashapis manami wiyamaranchichu. Cananga ¿imanöpataj nishun wamra wañushanta? ¡Willaycushaga imatapis ruracurinmanmi!» nir.

¹⁹Mayur uywaynincuna quiquin-pura yachayllapa parlajta ricar Davidga tantiyacuran wamra wañushanta. Chaymi tapuran: «¿Wamra wañushanachu?» nir.

Paycunana niran: «Au, wañushanami.»

²⁰Chaura Davidga jatariran pampapita. Bänacurir, perfümita pichucurir röpantapis rucacuran. Nircur TAYTA DIOSPA wasinman yaucuycur Tayta Diosta aduraran. Wasinman aywarcurna micuyta mañacurcur micuran. ²¹Chaura uywaynincunaga tapuran: «¿Imatataj ruranqui tayta? Wamra cawaycaptinräga ayunar wagallar caycashcanqui. Wamra wañuycuptin ichanga jatarcur micuytana gallaycunqui» nir.

²²Davidna niran: «Wamra cawaycaptenga yarparä TAYTA DIOS cuyapämashpan wamrata allchacächinanti. Chaymi llaquicuytita ayunar

wagashcä. ²³Wañushana caycactinnaga ¿imapänataj ayunashäpis? Nogaga manami cawarachëman-nachu. ¡Nogami ichanga aywashaj paywan tincoj. Payga mananami cutimonganachu tincunäpaj!»

Salomón yurishan

²⁴Chaypita David aywaran warmin Betsabëta shacyächej. Watucoj aywar Betsabëwan cacuran. Chaypita gueshyacuran ollgu wamrata. Davidga jutinta churaparan «Salomón» nir. TAYTA DIOSGA chay wamrata cuyaran. ²⁵Chaymi profëta Natanwan TAYTA DIOS willachiran wamrapa jutinta «Jedidías» nir churapänanpaj.

Rabá siudäman David yaucushan

(1Crón. 20.1-3)

²⁶Chaycama Joabga yaucucuycuran Amón runacuna tiyaycashan Rabá siudäman. Quiquin mandaj jamaraycashan siudäta charinanpaj caycashancho ²⁷Davidta willachiran: «Rabá runacunawanmi pilyarcaycashcä. Maynami charishcä siudäman yacu yaucunan cajta. ²⁸Tayta, cananga shuntay waquin suldärucunata. Nircur yaucuy siudäta charinayquipaj. Chaura nogaga manami yaucushänachu charinäpaj. Chaynöpami siudätaga nogapa jutëta mana churapangachu.»

²⁹Chaura Davidga llapan suldäruncunata shuntacurcur jinan öra aywaran. Nircur Rabá siudäta charicurcuran. ³⁰Rabäpa rayninpa umancho caycaj gori corönanta guechuran. Chayga caran cuyayllapaj rumicunawan tacuchiypa burdasha. Corönaga lasaran quimsa chunca quimsan (33) quílumi. Chayta Davidta jatiparan. Davidga siudäpita jorguran aypallata imatapis mas alli cajcunata. ³¹Siudächo quëdaj runacunatapis jorguran. Nircur aruchiran picucunawan ojtycho; jächawan, rusadörawan gueru rogyucho; ladrillu cuwaycho.

Chaynöllä ruraran llapan Amón siudä-cunacho. Nircorga suldäruncunawan cuticuran Jerusalemman.

Pañin Tamarta Amnón pengayman churashan

13 ¹Davidpa wamran Absalonpa pañin caran cuyayllapaj jipash. Jutin caran Tamar. Chaymi juc warmicho caj Davidpa wamran Amnonga chay jipashta munacurcuran. ²Runa yatäni donsëlla jipash captinmi Tamarta imaypis cuydaj. Chaymi Amnonga imanöpapis pañinwan cacuyta mana camäpachushpan micuytapis ni puñuytapis mana tarir gueshyaran. ³Amnonpa juc amigunnami caran sabidu. Jutin caran Jonadab. Chay runa caran Davidpa wauguin Simeapa wamran. ⁴Juc junaj Amnonta Jonadab tapuran: «¿Imanaycanquitaj? Raypa wamran caycarga ¿imapitataj waranmanlla juc-nirajyasha juc-nirajyasha caycanqui? Ima päsaycäshushayquitapis ¿manachu willapämanquiman?»

Chaura Amnón niran: «Waugü Absalonpa pañin Tamartami fiyupa munapaycä.»

⁵Chaura Jonadabga sumaj tanti-yachiran «Artita rurar gueshyaj-tucushpayqui cämallayquicho jitaräcuy. Papäniqui ricashoj shamup-tenga ruwanqui «Pañë Tamar shamuchun micuyta garamänapaj. Caycho ima micuyllatapis rurapämächun» nir. Chayrämi pañiquita ricanquipaj. Garashushayquitapis micunquipaj» nir.

⁶Chaura Amnonga gueshyaj-tucur cämallancho jitaräcuran. Ray ricaj aywaptin Amnonga niran: «¿Ruwacushayqui! Pañë Tamar cayman shamuchun. Ñaupächo bölluta rurachun. Nircur quiquin garamächun.»

⁷Chaura Davidga Amnonpa wasinman aywananpaj Tamarta cachar niran: «Tamar, ayway turiqui Amnonpa wasinman. Chaycho yanupämuy.»

⁸Chaura Tamarga aywaran turinpa wasinman. Amnonga gueshyar jitaraycaran. Tamarga jarinata chapusha. Bölluta rurarcu ancasha. ⁹Nircur sartinpita jorgurcur garasha. Chaura Amnonga mana micuyta munashachu. Llapan runataraj wajtaman gargusha.

¹⁰Llapan llojshicuriptin Amnonga Tamarta niran: «Micuyta cuartöman apaycamur quiquiqui garamay.»

Chaura Tamarga rurashan bölluta apaparan turin Amnonpa cuartunman. ¹¹Micunanpaj ñaupanman chayachiptin pañinta maquipita charircur: «Gamwan cacuytami munaycä» niran.

¹²Chaura Tamarga niran: «¡Ama! ¡Ama pirdisyunta ruramaychu! Israelcunaga manami chayno ruranchichu. ¡Ama ruraychu fiyupa juchataga!

¹³¿Pengacuypita maymanraj noga aywashaj? Gamtapis Israelchöga «upa» nishunquipämi. Rimëroga raywanraj parlay ari. Payga auningami majachacänanchipaj.»

¹⁴Amnonga imata niptinpis mana wiyaranchu. Mas callpayoj cashpan firsapita Tamarta bigulariran.

¹⁵Bigularerga Tamarta Amnón fiyupana chiquicurcan. Amatar cuyashanmanno fiyupa chiquicurcur niran: «¡Juclla jatariy. Aywacuy!»

¹⁶Chaura Tamar niran: «¡Ama gargamaychu ari! Canan gargamaptiquega ruramashayquipitapis mas piyur juchatami ruranquipaj.»

Amnonga wiyaytapis mana muna-rannachu. ¹⁷Chaypa ruquenga uywayninta gayarcu niran: «¿Caypita garguy cay warmita. Nircur puncuta sumaj wichgarcuy!»

¹⁸Chaura uywaynenga wasipita garguran. Nircur puncuta sumaj wichgarcuran. Tamarga raypa runa yatäni jipash wamrancuna jaticunyashan bistiduta jatiraycaran. Cuyayllapaj alli bistiduta jatiraycashancho ¹⁹rachirusharan. Llaquicushpan umanman

uchpata wiñacuran. Umanta charicucur wagaraycar aywacuran näninpa.

²⁰Chaura turin Absalón tapuran: «¿Turiqui Amnonchu bigulashurayqui? Chayno rurashushayquipita ama llaquicuynachu ni pitapis ama willapaychu. Turiqui caycaptenga jina chayllachöna usharächun.» Chaypita-pacha pasaypa pengacushpan Tamarga tiyacuran turin Absalonpa wasillanchöna.

²¹Ray Davidga Amnón rurashanta musyaycur fiyupa rabyaran. Rabyarpis wamran Amnontaga mana piñacurancho guechpa wamran captin amatar cuyashpan. ²²Absalonpis may-jina chiquirpis wauguin Amnonta imatapis mana rimaparanchu. Pañin Tamarta pirdisyunta rurashanpita fiyupa chiquiran.

Amnonta Absalón wañuchishan

²³Chaypita ishca watataga Absalonpa uywaynincuna millwata rurucaycaran Baal-hazor parti Efraín runacunapa marcan sercancho. Absalonga iwal micunanpaj llapan wauguincunata gayachiran. ²⁴Quiquin raytapis aywaycur niran: «Tayta ray, uywaynëcunami millwata rurucaycan. Chaymi llapan mandäshishojniquicunawan goturpayta munä.»

²⁵Chaura ray niran: «ÿju, llapanëga manami aywämanchu. Alläpami gastacachishayquipaj.»

Absalón yaparir-yaparir niptinpis rayga aywayta mana munaranchu. Jinallancho bindisyunta goran.

²⁶Chaura Absalón niran: «Tayta, quiquiqui aywayta mana munarga waguë Amnonllatapis cachamuy goturänäpaj.»

Niptin ray tapuran: «¿Imanirtaj munanqui wauguiqui Amnón yan'gäshunayquita?» nir.

²⁷Chayno niptinpis Absalonga yaparir-yaparir ruwaran. Chaura rayga

aurinan wamran Amnón, waquin wamrancunapis aywananpaj.

Absalonga ray micunantano alli micuyta ruraran. ²⁸Uywaynincunata mayna nisha caran: «Amnón machashana captenga «wañurachiy» niptë jinan öra wañurachinqui. Ama manchacunquichu. Gamcunaga ruranki noga nishäta. Balurchacuy.»

²⁹Chaura Absalonpa uywaynincunaga Amnonta wañuycärachiran patrinnin nishanta cumlir. Chaura raypa llapan wamrancuna jinan öra mülanacunata muntacarcärir gueshpir aywacuran.

³⁰Chaypita manaraj wamrancuna chayaptin Davidga willapata mayaran llapan wamrancunata Absalón wañuycachishanta. ³¹Chaymi rayga llaquicuypita röpantapis rachir-usharan. Nircur pampaman jitacacuycuran. Chaycho caycaj uywaynincunapis röpanacunata rachir-usharan. ³²Wauguin Simeapa wamran Jonadab ichanga Davidta niran: «Tayta, llapan wamrätami wañuchisha» nir ama yarpachacuychu. Wañuchishaga Amnonllatami. Chayno rurananpämi Absalonga yarparan pañin Tamarta bigulashanpita-pacha. ³³Chaymi tayta, ama yarpaychu llapan wamrayquicuna wañushantaga. Amnonllami wañushaga.»

³⁴Absalonga gueshpir aywacuran. Raypa ricchacojnin mösuna ricchacurishancho ricaran achcaj runacuna Horonaim näninpa pullan tunata uraycämojta. Chaura ricachacöga rayman aywaran «aypalla runa Horonaim näninpa uraycämün» nir willaj. ³⁵Jonadabga rayta niran: «Tayta, yarpashänöllami casha. Aywaycämunnami wamrayquicunaga.»

³⁶Parlayta usharishallantana raypa wamrancunaga chayaran. Nircur llapan gaparaypa wagayta gallaycäriran. Chaura raypis llapan

uywaynincunapis fiyupa wagan.
³⁷Davidga wamran Amnonpaj llaquicushpan waran-waran wagaj.

Absalonnamí gueshpír aywacuran Gesur nasyunpa raynin Talmai cajman. Talmaiga Amiudpa wamranmi caran. ³⁸Absalonga chaycho goyácuran quimsa wata. Chaycama Davidga wamran Amnonpaj wagallarmi goyaran. ³⁹Chaypitaga Amnonpaj manana llaquicurannachu. Wamran Absalonpaj fiyupa llaquicur paywan tincuytana munaran.

Absalón cutinanpaj Joab camacächishan

14 ¹Wamran Absalonpaj David fiyupa llaquicurpis cutichimuyta mana munashantami Sarviapa wamran Joab tantiyaran. ²Chaymi gayachimuran Tecoa marcacho tiyaj sabidu warmita. Nircur artita rurananpaj Joab yachachiran: «Artita rurar llaquicunqui. Llaquicushayqui musyacänanpaj sajjí röpata jaticunqui. Ama perfümiwanpis cupacunquichu. Gamga caycänayqui wañupacushanpita unaypita-pachana llaquicuycajno. ³Nircur aywanqui rayman. Noga yachachishänölla llapanta rimanqui.»

Imano ninanpäpis Joab yachachishanpitanaga ⁴Tecoa warmi aywacuran rayman. Rispiritashpan urcunpis pampaman töpananyaj gongurpacuran. Nircur niran: «Yanapaycallämay ari tayta.»

⁵Chaura ray niran: «¿Imatataj munaycanqui?»

Niptin warmiga niran: «Nogaga biyüdami cá. Runä wañushami.

⁶Tayta mandaj, nogapaga ishcaymi wamrä casha. Chaycunami pillaysha jircacho. Mana pipis raquinanpaj captinmi jucnin cága jucajta wañuycachisha. ⁷Chaymi cananga llapan castácuna chiquicarcamasha. Wañuchej caj wamräta paycunaman

apanäta munarcaycan wauguinta wañuchishanpita wañuchinanpaj. Ima-aycäwanpis pay japallanna quëdananpaj caycaj wamräta mi illgachiya munaycan. Chauraga famillyä manami canganachu. Chayno ruraptenga runäpa castan manami canganachu.»

⁸Chaura rayga warmita niran: «Cuticuy wasiquiman. Cananga nogami camacächishaj faburniquina.»

⁹Chaura warmiga niran: «Tayta ray, grasyas cuyapämashayquipita. Ray caycar yanapämashayquipita pipis jamurpäshuptiquega nogami y taytäpa castancunami juchayoj cashaj.»

¹⁰Chaura ray niran: «Pipis rimashuptiquega caycho arriglashun. Chaura mananami mastaga rimanganachu.»

¹¹Chaypis warmiga niranraj: «¡Tayta ray fiyupami ruwacö. TAYTA DIOS-NIQUITA mañacaycamay, wamräta wañuchiya munaycaj famillyan mana wañuchinanpaj!»

Chaura rayga niran: «¡TAYTA DIOSPA jutinchömi jurä. Wamrayquitaga manami pipis wañuchengachu!»

¹²Chaypis warmiga yapayraj niran: «Tayta ray juc shimillana rimarcamushaj ari.»

Chaura rayga niran: «Nimay ari.»

¹³Warmiga niran: «Tayta ray cananga shimillayquimi jitarpu-shunqui. Gamga jitarisha wamrayqui cutimunanta mana munarmi juchayoj caycanqui. ¹⁴Llapanchäpis wañushunpämi. Pampaman yacuta jicharerga manami shuntanchinachu. Tayta Diosmi ichanga pitapis mana wañuchinchu. Chaypa ruquenga imanöpapis camacächin gargushacuna ñaupanman cutinanpaj.

¹⁵«Gamwan parlay shamunäpäga wañuchiya munaycaj famillyancunami manchachimasha. Chaymi nogaga yarparä: ¡Imano captinpis parlashaj raywan. Capaschari ruwacushäta wiyamangapis»

nir. ¹⁶Yarpashanno wamräta wañucherga Tayta Diospita chasquishä partisyunpitapis gargaraycamangachari. Chayno mana cananpämi ruwacoj shamushcä.

¹⁷Tayta Diospa anjilninnömi gamga tantiyanqui allitapis mana allitapis. Chaymi yäracö faburnë jatarinay-quipaj cashanta. TAYTA DIOSNINCHI yanapayculläshunqui tayta.»

¹⁸Chaura rayga warmita niran: «Willamay. Juctapis ama pacapämaychu.»

«Mä nimay ari tayta» niran warmiga.

¹⁹Chaura ray tapuran: «¿Gamtaga manachu Joab llapantapis yachachisha-cashunqui?» nir.

Warmina niran: «Au, llapantapis rasun cajllatami rimashcanqui tayta. Nogataga mandaj suldäruyqui Joabmi cachamasha. Rimanäpäpis llapanta yachachimasha. ²⁰Ichanga yachachimasha mas alli cananta munarmi. Chaypis gamga Tayta Diospa anjilninnömi llapanta musyanqui cay nasyunchö imanöpis caycashantaga.»

²¹Chaymi rayga Joabta niran: «Joab, maynami yarpashayquita aunishcä. Chaymi cananga wamrä Absalonta cutichimuy.»

²²Chaura Joabga rispitashpan gongurpacur umpuran urcunpis pampaman tüpananyaj. Bindisyunta gor niran: «Cananga musyami ray cuyapämashanta. Rayga nishäta aunimashami.»

²³Chaypita jinan öra Joabga aywaran Gesur partiman Absalonta Jerusalem cutichinanpaj. ²⁴Raymi ichanga niran «wasinman derëchu aywacuchun. Ama ricamächunchu». Chaura Absalonga raywan mana tincullar derëchu wasinman aywacuran.

²⁵Intëru Israelcho ni jucpis manami caranchu Absalonno camaraj mösuga. Chaquipita-pacha umancama sänu caran. Chaymi llapan cuyaj. ²⁶Amatar

rabyachiptin ajchanta rutucoj cada wata. Ajchan lasaj ishca y quillupita mas, palasyu balansawan pësaptin. ²⁷Absalonpaga caran quimsa ollgu wamran. Warmi wamranpapis jutin caran Tamar. Payga caran cuyayllapaj camarajlla.

²⁸Absalonga ishca y wata goyaran Jerusalemcho raywan mana tincuyllapa. ²⁹Chaypita Absalonga Joabta gayachiran rayman cachacunapaj. Joabga aywayta mana munaranchu. Yapaypis Absalonga gayachiran. Joabna mana munaranchu. ³⁰Chaura Absalonga uywaynincunata niran: «Joabpa chacraga nogapa chacrawanmi tincuraycan. Sebädami caycan. ¡Ayway sindipaycäriy!»

Absalonpa uywaynincunaga patrunnin nishanno Joabpa chacranta sindipaycuran. ³¹Chaura Joabga jinan öra Absalonpa wasinman aywar tapuran: «¿Imanirtaj uywayniquicuna chacräta cañapaycusha?» nir.

³²Chaura Absalón niran: «Papänë cajman aywanayquipaj ruwacuptëpis mana aywaptiquimi sebädayquita cañapaycunanpaj cachashcä. Cananga juella papänëman aywaycur niy: «Gamwan mana tincunanpaj caycap-tenga ¿imapätäshi Gesur nasyunpita wamrayquita cutichimushcanqui? Mana tincunayquipaj captenga jinan Gesurllachöshi tiyacunman caran. Caychöna caycarga gamwanshi tincuyta munaycan. Juchan captenga juclashi wañuchinqui.»

³³Chaura Joabga aywaran ray cajman. Willaran Absalón nishanta. Ray Davidna gayachiran. Ray cajman chayar Absalonga gongurpaycur umpuran urcunpis pampaman töpananyaj. Raypis wamranta muchashpanraj jamachiran.

Davidpa contran Absalón jatarishan

15 ¹Chaypita mas unaytaga Absalonpa caranna pillypaj carrëtanpis, cawalluncunapis.

Pichga chunca (50) suldärucunata churacurcuran ñaupapänanpaj.
²Waran waranmi chaca chacalla marca yaycuna puncuman Absalón aywaj. Chaychömi David cajman quijajoj aywajcunata gayaycur imapita quijajoj aywaycashanta y maygan trībupita cashantapis tapupaj. Willaptinnami ³Absalón nej: «Allitami rasun cajtami niycanqui. Ichanga raypa yanapajñincuna manami mayganpis arriglashunayquipaj canchu.» ⁴Mastapis Absalón nej: «Cay nasyuncho noga juez caycöman. Pipis dimandunwan chayamuptin allimi arrigläman.» ⁵Pipis saludaptin Absalonga macallaycur-raj muchaj. ⁶Chayno ruraj lllapan Israelcuna rayman dimandunta arriglananpaj aywajcunata. Chaynöpami lllapan Israelcuna Absalonta cuyacurcuranna.
⁷Chaypita chuscu wata päsarcup-tinnami ray Davidta Absalón niran: «TAYTA DIOSNINCHÏTA aunishäta cumlir sacrificisyuta rupachinäpämi Hebrón marcaman aywayta munaycä, papä. ⁸Siriacho caycaj Gesur marcacho caycarmi TAYTA DIOSNINCHÏTA aunirä: «TAYTA DIOS, Jerusalemman cutichimaptiquega Hebronman aywaycurmi sacrificisyuta rupachir gamta adurashayqui» nir.»
⁹Rayga «Ayway ari» niran.
 Chaura Absalonga Hebronman aywacuran. ¹⁰Jinan öra cachacunata cacharan intëru Israel trībucunata willananpaj: «Trompëta wagajta wiyarga «Hebronchömi Absalontana ray cananpaj churasha» ninqui» nir.
¹¹Ishcay pachac (200) runacunata Jerusalem pita pusharan. Runacunaga imaman aywaycashantapis mana musyaranchu. ¹²Absalonga gayachiran Davidpa willapajnin Ahitofeltapis. Payga caran Gilo siudäpita. Gayachiran Tayta Diosta rispitar uywata pishtaptin yan'gänapaj. Absalón rayta guechuyta yarpashanga

rasunpaycaranna. Absalonpa faburnin cäga masna yaparcaycaran.

Jerusalenpita David gueshpishan

¹³Juc runa chayaycur Davidta willaran «Absalón ray cananpaj lllapan Israel runacunami faburnin jatariycan» nir. ¹⁴Chaura Davidga Jerusalemcho mayur uywayncunata niran: «¡Canan öra gueshpicushun! Man'chäga Absalón chayamuptin mananami gueshpiytapis puydishunpänachu. ¡Juclla aywacushun Absalonpitaga! Mana gueshpicushaga cay siudächo lllapanchïtami sabliwan wañuchimäshun.»

¹⁵Chaura paycunaga rayta niran: «Tayta, nishayquitami nogacunaga rurashaj.»

¹⁶Chaynöpami rayga aywacuran palasyucho tiyajcunata pushacurcur. Chunca chinancunallatana cachaycuran palasyuta täpananpaj. ¹⁷Lllapan yan'guincunawan aywacuycashancho rayga siudäpita llojshiycashancho ichiycuran. ¹⁸Ñaupanman churacaran lllapan mandaj suldärucuna. Rayta täpaj Ceret runacuna, Pelet runacuna, Gat runacuna raypa ñaupanpa päsaycaran. Täpajcunaga caran sojta pachac (600). ¹⁹David ichiraycashañ lädunpa paycuna päsaptinmi Gatpita capitán Itaita ray David niran: «Mana Israel runa caycarga ama gaträmaychu. Nogawan aywarga pasaypami ñacanquipaj. Chayno caycaptenga mas allimi canman Jerusalemman cuticushpayqui ray Absalón cajcho quëdacuptiqui. ²⁰Mushojrämi chayamushcanquipis. ¿Imanöpataj «nogacunawan aywashun» nishayquipis? Quiquëpis manami musyächu mayman aywaycashätapis. Mas allí canman marca-masiqicunata pushacur cutichicuptiquimi. ¡Tayta Dios bindisyunta goycushunqui. Yan'gaycushunqui imaycamapis!»
²¹Chaura Itaiga rayta niran: «TAYTA DIOSPA jutinchö, gampa jutiquichömi

jurä. Maypapis gam aywashayquipami aywashaj wañunä captin cawanä captinpis.»

²²«Chauraga nogawan aywacushun ari» niran Davidga.

Chaynöpami Itaiga Davidwan aywacuran familyancunawan, yan'guincunawan. ²³Nänipa aywashanta ricarmi runacuna fiyupa llaquicur wagaran. Cedrón ragrata päsarmi ray David y paywan aywaj runacuna chunyaj chaqui jircaman aywaj nänillapa aywaran. ²⁴Aywaycaran Sadocpis llapan Leví castacunawan Diospa babulninta apashpan. Babultaga Abiatarpa ñaupanman churaran llapan runacuna siudäpita llojshinancama.

²⁵Ray Davidga Sadocta niran: «Tayta Diospa babulnintaga siudäman cutichiy. TAYTA DIOS yanapämaptenga cutimushämi. Chaura babultapis tolduntapis ricashärämi. ²⁶Ray canäta mana munaptenga ¿imanäshätaj ari? Pay munashannöchari llapanpis canga.»

²⁷Cüra Sadocta rayga mastapis niran: «Gamga, mana yarpachacuyllapa Abiatarwan ishcaniqui siudäman cuticuy wamrayquicunawan-cama. Gam cutiniqui wamrayqui Ahimaaswan; Abiatarwa wamran Jonatanwan.

²⁸Nogaga goyapärämushaj chunyaj chaqui jirca bädu-quinraycho gamcuna willachimashayquicama.» ²⁹Sadocwan Abiatarga Diospa babulninta cutichiran Jerusalemman. Nircur chaycho tiyacuran.

³⁰Olivos lömapa David wicharan gala chaquilla wagaraycar; llaquicuywan uman shucutasha. Paywan aywacoj runacunapis wagaraycar uman shucutashalla aywaraycaran. ³¹«Ahitofelmi Absalonpa shimita gojnin» nejta mayar Davidga TAYTA DIOSTA mañacuran Ahitofel yarpashan mana camacänanpaj.

³²Tayta Diosta adurana jircaman David chayaycuptin tariparan Arac runa Husai röpanpis rachir-ushasha, umanpis pasaypa allpalla.

³³David niran: «Aywäshimaptiquega manami allichu canga. ³⁴Jerusalemman cutirmi ichanga Ahitofel yarpashancunata pirdichiyta yanapämänqui. Absalonta ninqui: «Tayta mandaj canan nogaga munayniquichömi cashaj, ñaupata papäniquita sirbishäno». ³⁵Chaychömi carcaycan cüra Sadocwan Abiatarpis yanapashunayquipaj. Palasyucho imallata parlacushantapis paycunata willanqui. ³⁶Chaychömi wamrancunapis carcaycan Ahimaaspis Jonatanpis. Paycunawan willachimanqui imata musyashayquitapis.»

³⁷Chaypita Davidpa amigun Husaiga chayaran Jerusalemman Absalón yaucuycashan öra.

Sibawan David parlashan

16 ¹Punta wajtanta tumarcullar Davidga tincuran Mefi-bosetpa uywaynin Sibawan.^e Payga gatiycaran ishca y bürru sillashata. Cargasha apaycaran ishca y pachac (200) tantata, päsaspita pachac (100) bölluta, pachac (100) pogusha frütacunata, binutapis. ²Chaura ray tapuran: «¿Imapätaj apamushcanqui caytaga?»

Chaura Siba niran: «Bürrucunaga familyayquicuna muntacunanpämi. Tantawan frütaga suldärucuna micunananpämi. Binuga chunyajcho uticajcuna upunanpämi.»

³Rayga tapuran: «¿Maytaj patrunki quipa willcanga?» nir.

Chaura Siba niran: «Payga Canan Israelcuna nogatanami chachäpa ruquin ray churamanga» nirmi Jerusalemcho quëdacamusha.»

^e 16.1 2Sam. 9.9–10.

⁴Chaura ray niran: «Chayno captenga canan gampana cacuchun unay Mefi-bosetpa ima-aycanpis cashanga.»

Sibaga gongurpaycur niran: «Tayta ray, gampa maquiqui chaquiquichömi caycällä. Ojalä lllapan rurashäcunapis gam munashayquino caycullanman.»

⁵Ray David Bahurim marca quinrayman chayaycaptin Saúl casta runa chimpanpa llojshiyecaran. Chay caran Gerapa wamran Simei. Chimpanchöna cashpan Davidta tucuyta gayaparaycar aywaycaran. ⁶Davidta lllapan suldäruntinta sajmaran. Runacunapa, suldäruncunapa chauptinta aywaycaptinpis Davidtaga ⁷Simei gayaparan: «¡Caypita aywacuy wañuchicoj, fiyu runa! ⁸¡Cananga TAYTA DIOSMI castigaycäshunqui ruquin ray canayquipaj Saulpa castancunata wañuchishayquipita! ¡TAYTA DIOSMI ray cananpaj churasha wamrayqui Absalontana. Caycho caycanqui quiquiqui mana allita rurashayquipitami. Gamga canqui wañuchicojmi!»

⁹Chaura Sarviapa wamran Abisaiga ray Davidta niran: «Tayta, mana bälej allgoga ¿imanirtaj gayapashunqui? ¡Canan öra charir cuncanta cuchurishaj!»

¹⁰Niptin rayga niran: «Sarviapa wamrancuna, gamcunataga imata gocushunqui. TAYTA DIOS chayno nisha captinchari pay gayapaycäman. Chayno captenga ¿piraj ¡matataj rurashcanqui nenga?»

¹¹Nircur, Abisaita lllapan mandaj suldäruncunata niran: «Quiquëpa wamräpis wañuchimayta munaycaptenga masrächari Benjamín tribupita cäga. ¡Ama imatapis rimapaychu! ¡Jina gayapäcamächun! TAYTA DIOSCHARI chayno ninanpaj nisha. ¹²Capaschari TAYTA DIOS fiyupa llaquicuycajta ricamarga canan ashllimaptinpis bindisyunta gomanga.» ¹³Davidga yan'guincunawan aywacuran. Simeipis chimpanpa

päsacuran Davidta ashlliraycar, sajmaraycar, allpata machiraycar. ¹⁴Raypis yan'guincunapis pasaypa uticashana Jordán mayuman chayay jamayecaran.

Jerusalenman Absalón chayashan

¹⁵Chaycama Absalonga lllapan Israelcunawan Ahitofelwan Jerusalenman chayaran. ¹⁶Davidpa amëgun Arac runa Husainami Absalonta tariparan «¡Rayga alli cawachun, rayga alli cawachun!» nir.

¹⁷Chaura Absalón tapuran: «Cuanacushayqui amëguyquita ¿chaynöchu ruranqui? ¿Imanirtaj mana aywacushcanquichu Davidwan?»

¹⁸Chaura Husai niran: «Aywanäga manami camacanchu. Nogaga goyanä TAYTA DIOSPIS, Israelcunapis acrashan raywanmi. ¹⁹Sirberga amëgöpa wamrantami sirbishaj. Chaymi nogaga papäniquita sirbishäno gamtapis sirbishayqui.»

²⁰Chaypitanaga Ahitofelta Absalón niran: «¿Imatataj ruräman?»

²¹Chayno Absalón tapuptin Ahitofel niran: «Papäniquimi chinancunata cachasha palasyuta täpananpaj. Paycunata charircur-charircur ruracuriy ari. Chaynöpami lllapan Israelcuna tantiyacongä papäniquiwan chiquinacushayquita. Chaura masmi balurchanga gampa faburniqui caycajcunapis.»

²²Chayno niptinmi lllapan Israel runacuna ricananpaj palasyu jananchu juc tolduta Absalonpaj ruraran. Chaychömi taytan Davidpa chinancunata charircur-charircur cacuran.^f ²³Chay wichan Ahitofel willapashantaga Tayta Dios nishanta-yupaymi wiyacoj. Davidpis Absalonpis wiyacoj.

Ahitofel yarpashanta Husai pirdichishan

17 ¹Chaypita Absalonta Ahitofel niran: «Noga acrashaj chunca ishcaj waranga (12,000) runacunata

mas allinllanta. Canan chacay Davidta gatih aywashaj. ²Pay uticasha caycaptin illajpita yaycapaycushaj. Manchachishaj. Chaura llapan runacunami gueshpír aywaconga. Ray japallantami wañuchishäga. ³Chaynöpami Davidwan aywaycaj runacunata mana wañuchishänachu, sinöga yarpashayquino David japallantami. Chaynöpami llapanpis maquiquicho cashpan jaucana cawanga.»

⁴Chayno yarpashan alli caran Absalonpaj, Israel mandajcunapaj. ⁵Chaypis Absaloga Arac runa Husaita gayachiran yarpashanta willanapaj. ⁶Chayaptin Absaloga Husaita niran: «Ahitofel yarpashanga ¿allichu u manachu? ¿Pay nishanta rurashwan-chu u manachu? Gamga ¿imatataj yarpanqui?»

⁷Niptin Husai niran: «Cananga Ahitofel yarpashan manami sumaj allichu. ⁸Gamga musyanquimi papäniqui, yan'guincuna pillyay yachaj cashanta. Cananga wawan guechusha ösu-japuypis fiyupa rabyashami caycanga. Jinachöpis papäniquga pillyay yachacashami. Chaymi waqinwan iwalga mana puñongachu. ⁹Canan örami pacaraycanga machaycho carpis juc-lächo carpis. Gallaycunallanchöna juc ishcay suldäruyquicunata wañurachiptenga willapa mashtacanga «Absalonpa suldäruncunata binsishana» nir. ¹⁰Chayno wañuchiptenga liyunno may-jina fiyu carpis suldäruyquicuna mananami pillyayta munanganachu. Llapan runacunami musyan taytayquipis y suldäruncunapis mana manchaypa pillyaj cashanta.

¹¹«Nogapitaga alli canman Dan partipita Beersebacama llapan Israelcunata shuntachiptiquimi. Israelcunaga lamar cantuncho agushnörämi aypalla. Paycunataga pillyaman quiquiqui pushay. ¹²Chaura papäniquita maychöpis tarishanchicho

wañuchishun. Payta tamyano usharishun. Juctapis manami cawaycajta cachaycushuncho. ¹³May siudäman pacacuptinpis llapanchi aywashun wascanchiwan-cama. Chay siudäta illgächir rumincunatapis ushajpaj apashun yacu aywaj ragaman. Chauraga ni juc rumillapis manami quédangapächu.»

¹⁴Husai yarpashanga mas alli caran Ahitofel yarpashanpitaga. Chaymi Absalonpis llapan Israelcunapis alli chasquiran. (Ahitofel yarpashantaga TAYTA DIOSMI pirdichiran Absalón wañunanpaj.)

¹⁵Chaypita Husaiga willaran cüra Sadoctawan cüra Abiartarta imano Ahitofel Absalonta llapan Israel auquincunata willapashanta, quiquin Husai imano willapashantapis.

¹⁶Niran «Davidta apurä willay. Canan chacayga chunyaj pampacho ama puñuchuncho. Jinan öra Jordanpa chimpanman aywacuchun. Chauraga paytapis ni yan'guincunatapis mana wañuchengachu.»

¹⁷Jonatanwan Ahimaas carcaycaran En-rogel particho. Paycunaga pacarpaycaran siudächo tiyajcuna mana ricananpaj. Chaymanmi juc uyway warmi aywaran willaj. Chaura paycunaga jinan öra aywaran Davidta willaj. ¹⁸Chayno pacayllapa aywaycashanta juc mösu ricaycurmi Absalonta willaran. Gatipänanpaj cashanta malisyarmi Jonatanwan Ahimaas apurä aywar Bahurim marcaman chayaran. Chayaycurmi juc runapa wasi puncuncho wallecalla yacuyoj pösu caycajman ishcan pacacuycuran. ¹⁹Wasiyoj runapa warminna chapacuran. Jananmanna érasha rüguta majaran. Chaytaga manami pipis ricaranchu. ²⁰Absalonpa yanapajincuna chayar warmita tapuran: «¿Maytaj Ahimaaswan Jonatán?» nir.

Warmina niran: «Caypami päsa-cusha mayuman.»

Chaura Absalonpa gatrirajncunaga ashej aywaran. Mana tariycärrergera Jerusalenman cuticuran. ²¹Chay runacuna cuticuriptenga Ahimaaswan Jonatän pösüpita llojshirir cörriyllapa aywaran ray Davidta willaj. Willaran «jinan öra mayuta päsarir aywacuy. Ahitofelmi wañuchishunayquipaj willapasha» nir. ²²Chaura Davidga yan'guincunawan jinan öra apurä mayuta päsarir aywacuran. Pacha wararcuptinnaga manana pipis caran-nachu. Mayuta llapanna päshasha caran.

²³Ahitofelga yarpashan mana camacaptin bürrunta sillacurcur yurishan marcanman aywacuran. Incargacurir quiquin maticuriran. Chaynöpami wañuran. Papänin pampacushallanman pampaycärriran.

Mahanaim partiman David chayashan

²⁴Chaypitanami Davidga chayaran Mahanaim siudäman. Chaycho caycaptinmi Absalón y llapan Israel runacuna Davidta gatipar Jordán mayuta päsarän. ²⁵Absalonga Joabpa ruquin suldäruncunapa mandajnin cananpaj churaran Amasata. Payga caran Ismael casta Itrapa wamran. Itraga Nahaspa wamran Sarviapa ñañan Abigailwan cacuran. Abigail-nami caran Joabpa mamanpa ñañan.

²⁶Absalonga Israelcunawan chayar pachacuran Galaad partiman. ²⁷David Mahanaimman chayaptinna tariparan Nahaspa wamran Sobi. Payga caran Amoncho caj Rabäpita, Amielpa wamran Maquir. Chayga caran Lodebar partipita. Barzilaipis shamuran. Payga caran Galaadcho caycaj Rogelimpita. ²⁸Paycunaga aparan allpa mancacunata, angarcunata, cämata, rīguta, sebädata, jarinata, camchata, äbasta, landrijasta, ²⁹mish-quita, wäcapa uyshapa lëchinpita

quësuta, David yan'guincunawan micunanpaj. Paycunaga aparan «chunyajpita aywaycämorga fiyupa uticashachari, yargaypitachari, yacunaypitachari caycan» nir yarpashpan.

Absalón wañushan

18 ¹Chaypitanami suldäruncunata shuntarcur capitancunata David churaran cada waranga (1,000) suldärucunata y cada pachac (100) suldärucunata mandananpaj. ²Joabga rimir caj röpata mandarän. Jucaj röpata mandarän Abisai. Paycunaga ishcänpis caran Sarviapa wamrallan. Juc röpatana mandarän Gat runa Itai. Llapan suldärucunatana David niran: «Nogapis aywäshishayqui pilyaj.»

³Chaura paycuna niran: «Ama tayta. Nogacuna gueshpiptëpis, pullannë wañuptëpis manami imapis gocongachu chiquimajninchitaga. Paycunapäga gam caycanqui chunca waranga (10,000) suldärucunanömi. Chaymi mas alli canga cay siudällacho quëdacuptiqui, nogacunata yanapämänanpaj mas runacunata cachamunay-quipaj.»

⁴Chaura rayga «Yä. Gamcuna nishayquino cachun ari» nir siudäpita llojshinan sawan puncu lädunman ichicuycuran. Suldärucunaga llojshiran waranga-cama (1,000), pachac-cama (100).

⁵Rayga niran «Joab, Abisai, Itai nogata rispitamarga wamrä Absalon-tapis cuyapaycuy.» Ray chayno nishantaga llapan suldärucuna wiyaran.

⁶Chaynömi suldärucuna aywacuran Israelcunata ichipänanpaj. Pilyaga caran Efraín parti munticho. ⁷Davidpa suldäruncunaga Israelcunata binsiran. Chay junäga fiyupa wañuchinacuy caran. Wañuran ishchay chunca waranga (20,000) runacuna. ⁸Chaura pilyaga mashtacaran intërupana.

Chay pillyachömi espädawan runacunata suldärucuna wañuchishanpitapis mas achca runacuna munticho ushacaran.

⁹Absalonga mülan muntasha aywaycashioncho illajpita tincupuraran Davidpa suldäruncunawan. Chaura müлага gueshpír yagacuycuran encina yöra rurinpa. Absalonga umanpita rancacäcuran guerupa callapanman. Umapita warcuraycarna quédacuran. Müлага gueshpír aywacuran.

¹⁰Chayno warcuraycajta juc runa ricaycur aywaran Joabta willaj: «Absalonta ricashcä encina yöracho warcuraycajta» nir.

¹¹Chaura Joabga niran: «Ricaycarga ¿imanirtaj jinancho mana wañura-chirayquichu? Nogaga cushicuypita chunca guellayta, sinturunta pägäman caran.»

¹²Chaura chay runaga Joabta niran: «Gam ni waranga guellayta pägamap-tiquipis manami wañuchimanchu raypa wamranta. Nogacunaga wiyashcämi Absalonta mana wañuchinay-quipaj quiquin ray, gamta, Abisaita, Itaita nishushayquita. ¹³Noga gam nishayquino ruraptëpis manami allichu canman caran nogapäga. Rayga llapantami musyanman caran. Mayacaptin gamga manami washämanquimanchu caran.»

¹⁴Niptin Joabga «Gamwan parlarga timpötami pirdë» nir aywaran quimsa lëchata aptacurcur. Absalonta shongucho tucsipaycuran. Payga encina guerucho cawaycar-raj warcuraycaran.

¹⁵Chaypita jananmanpis Joabpa chuncaj suldäruncuna yurircamur Absalontaga yapanraj. ¹⁶Nircur Joabga niran trompëtata tucanapanj. Chaura suldäruncunaga jinan öra cachaycuran Israelcunata gaticachaycashancho.

¹⁷Absalontaga munticho jatun uhcu-man jitarpäriran. Jananman aypalla rumita goturan. Israelcunaga gueshpírna aywacuran wasinman-cama.

¹⁸Cawaycällarna Absalonga rura-chicurán pergata «Raypa Ragran» nishancho. Rurarcachir quiquinpa jutinta churaparan «yarpämánapaj wamrä manami cannachu jutita apaj» nir. Chaymi canancamapis «Absalonpa pergán» nin chay pergata.

¹⁹Chaypita Sadocpa wamran Ahimaasga Joabta niran: «Ruwacushayqui. Rayta willamushaj <chiquishojcunapita TAYTA DIOS salbashurayqui» nir.»

²⁰Joabga niran: «Cananga gam aywanayqui manami camacanchu. Juc cutichönami aywanquipaj. Raypa wamranmi wañusha.»

²¹Etiopía runa suldäruta ichanga Joab niran: «Gam ayway. Rayta willanqui llapan ricashayquita». Chaura Etiopía runaga Joabpa ñaupánman umpuycur cörriyllapa aywacuran. ²²Ahimaasga Joabta yapay niran: «Etiopía runa aywaptin-pis nogapis guepanta aywashaj.»

Chaura Joab niran: «¿Imapätaj gam aywayta munanqui? Willashayquipita manami imatapis chasquinquipächu.»

²³«Manami imanánpischu. Cörriyllapa aywashaj» niran Ahimaasga.

Chaura Joabga «¡Ayway ari!» niran.

Ahimaasga aywaran cörriyllapa pampapa. Etiopía runataga llalliriran.

²⁴Davidga jamaraycaran siudäman yaycurina sawan puncullacho. Juc ricachacojna wichasha caran puncu janan pergaman. Ricchacurishancho ricäriran runa cörriyllapa aywaycämojta. ²⁵Jinan öra rayta gayacuran. Chaura rayga cushicurán:

«Quiquillan shamorga apamonga alli willapatami» nir. Mas sercatana runa aywaycämuptin ²⁶ricachacöga ricaran yapay juc runa cörriycämojta. Chaura puncu täpajta gayacuran:

«¡Yapay juc runa cörriyllapa aywaycämün!» nir.

Chaura rayga «Chaypis alli willapatami apamonga» niran.

²⁷Ricachacoj niran: «Rimir cäga cörriyacämün Sadocpa wamran Ahimaasnömi» nir.

Chaura rayga niran: «Payga alli runami. Apaycämonga alli willapata-tami.»

²⁸Chayaycur Ahimaasga raypa ñaupanman gongurpaycur umpuran saludanapaj. Nircur niran: «Amatar allimi gampa TAYTA DIOSNIQUEGA. Gamta chiquiyacáshojtaga paymi ushacächisha.»

²⁹Chaura rayga tapuran: «¿Allichu caycan wamrä Absalonga?» nir.

Ahimaasga niran: «Nogaga ricashcä fiyupa pillyatami Joab cachamashan öra. Ichanga manami musyächu ima päshantapis.»

³⁰Chaura rayga niran: «Juc cuchuman witicuy.»

Nishanno Ahimaasga witicuran.

³¹Chayno niyta usharcuptin chaya-muran Etiopía runa. Pay niran: «Tayta David, gampaj alli willacuytami apamushcä. Canan junajmi llapan chiquishojniquicunapita TAYTA DIOS-NINCHI salbashurayqui.»

³²Chaura rayga Etiopía runata tapuran: «Wamrä Absalonga ¿allichu caycan?» nir.

Chaura Etiopía runaga niran: «Tayta, gamta chiquishojcunaga llapanpis ojalä ushacanman tagay mösuno.»

³³Chaura rayga fiyupa llaquicurán. Puncu janacho caycaj cuartuman wiharcu wagayta gallaycuran. Wagar aywashpan niran: «¡Absalonllau Absalón! ¡Absalonllau Absalón! ¡Gam wañunayquipa ruquenga noga wañucöman caran! ¡Absalonllau Absalón!»

19¹⁻²Wamran Absalonpaj ray wagaycashanta llaquicycashanta runacuna musyaycur Joabta willaj aywaran. Chaynöpami chay junäga pillyar binsisha carpis fiyupa llaquicyman ticraran. ³Llapan suldä-rucunapis mana musyaj-tucushallana

siudäman chayaran. Aywarcaycaran pillyaycashanpita gueshpircur fiyupa pengay-tucushano. ⁴Chaycama rayga cäranata chapacurcur sinchipa gaparaycaran: «¡Absalonllau Absalón! ¡Absalonllau, Absalón!» nir.

⁵Chaura Joabga ray David cajman aywaycur niran: «Tayta, wañuy-pita salbasha caycaptëpis canan nogacunataga pengaymanmi churamashcanqui. Salbashcäcuna warmi ollgu wamrayquicunata, llapan warmiquicunata, chinayquicunata. ⁶Cananmi ichanga musyäna mandaj suldäruyquicuna, capitanniquicuna imapäpis mana bälishäta. Chiquishoj cajtami cuyanqui. Cuyashoj cajtaga chiquinquimi. Cananga nogapis tantiyacushcä tayta. Gampäga mas allimi canman canan öra Absalón cawaycaptin, nogacuna llapanë wañusha captëpis. ⁷Tayta, cananga llojshircu shacyächiy gatiräshojcunata. Man'chäga wara tutapaj manami ni jucnayllapis warämongapächu gamta gatiräshojcuna. Tayta Diospa jutinchömi jurä. Chaura gampäga cangapaj mas piyur llaquicyymi mösu cashayquipitapacha canancama manaraj imaypis cashanno.»

⁸Chayno niptin rayga aywar siudä puncuman jamacuycuran. «Ray puncucho jamaraycan» nir willaptin llapan runacuna aywaran raypa ñaupanman.

Jerusalenman David cutishan

Davidpa contran pillyaj caj Israel runacunami ichanga gueshpir wasincunapa aywacuran. ⁹Llapan Israelcunaga rimanacurcaycaran «Ray David salbamaranchi chiquimajninchi Filistea runacunapa mayayninpita. Chaypis Absalonmi juchayoj David marcanchipita gueshpicunapaj. ¹⁰Noganchëga Absalontami churaran-chi rayninchipaj. Nishanchëga pillyachömi wañusha. Cananga ¿imatataj

rurashun? Simri cutichimushun ray Davidta ari.»

¹¹ Israelcuna chayno parlashantaga ray Davidpis mayaran. Chaura payga cachacuran cūra Sadocman cūra Abiatarman. Cachacur niran: «Gamcuna parlay Judá mandaj auquincunawan. Tapunqui: ¿Imanirtaj gamcunaga ray Davidta palasyuman jucyaj mana cutichimunquichu?» nir. ¹² Paycunaga noga familyami. ¿Imanirtaj ultimutaraj cutichimayta munan? ¹³ Amasatapis ninqui: «Gam nogapaga canqui yawar masëmi. Cananpita gamna canquipaj lllapan suldäröcunapa mandajnin, Joabpa ruquin. Nishäta mana cumlip-tëga Tayta Dios fiyupa castigamächun.»»

¹⁴ Chaymi Amasaga Judá runacunata aunichiran. Chaura paycunaga juc shimilla «ray David lllapan mandaj suldäruncunawan cutimuchun» niran.

¹⁵ Chaura rayga cutir chayaran Jordán mayuman. Judá runacunaga aywaran Gilgalman chaycho tincunanpaj, Jordán mayuta chimpachinanpaj.

¹⁶ Gerapa wamran Simeipis aywaran.^g Payga caran Benjamín trībupita. Yuriyenga caran Bahurim marcapita. Paypis aywaran ray Davidta taripaj Judá runacunawan iwal. ¹⁷ Simeita yan'garan waranga Benjamín runacuna. Saulpa uywaynin Sibapis chunca pichga (15) wamrancunawan, ishcaychunca (20) uywaynincunawan aywaran. Manaraj ray chayaptin Jordanman chayaran. ¹⁸ Jordán mayuman chay runacuna chayaycurmi bäduta päsaran ray Davidtawan castancunata päsachinanpaj.

Jordán mayuman chayaycur ray David chimpananpaj caycaptinmi Simeichayaran. Davidpa ñaupanman gongurpacuycushpanmi ¹⁹ Simeiga niran: «Amatarmi ruwacö tayta ray. Nogapa juchätaga ama yarpaychu,

Jerusalenpita llojshiptiqui llutanta yarpashpä gayapashätaga. Ama napanarämanquichu ari tayta. ²⁰ Quiquëpis juchayoq cashätaga musyaycämi. Josëpa caj castancunapitaga nogami rimir-puntatapis shamushcä gamwan tincunäpaj.»

²¹ Chaura Sarviapa wamran Abisaiga niran: «Simeiga wañunanmi camacan. Payga Tayta Dios acrashan raytami ashlliran, sajmaran.»

²² Niptin David niran: «Sarviapa wamrancuna, gamcunata imata gocushunqui. ¿Imanirtaj gamcunaga mana wiyamanquichu? Cananga noga rasunpami musyä Israelcunapapis yapay raynin cashäta. Chaymi canan junäga Israelcunacho ni jucnayllapis mana wañongachu.» ²³ Nircorga Simeita niran: «Gamga manami wañunquipächu.»

²⁴ Saulpa willcan Mefi-bosetpis tariparan.^h Payga ray aywacushan junajpita-pacha sänu cutimunancama chaquinta mana mayllacuranchu. Shapranta mana rutucuranchu. Röpan-tapis mana tagshacuranchu. ²⁵ Chaymi Jerusalenpita chasquicoj chayaptin payta David niran: «Mefi-boset ¿imanirtaj nogawan mana aywacurayquichu?»

²⁶ Chaura pay niran: «Uywaynë Sibami llullapämasha tayta. Mana puriyta puydishpämi gamwan aywacunäpaj uywaynëta «bürruta sillapäm muntacunäpaj» nirä. ²⁷ Nircur calumyamashpan willashurayqui. Tayta, chayno captinpis gamga Tayta Diospa anjilinnömi lllapanta musyanqui. Chaymi imatapis allita ruranquipaj. ²⁸ Papanë casta cajtaga lllapantami wañuchinayqui caran. Chaypis nogataga gayamashcanqui iwal micunapaj. Chayno caycaptenga masta manami mañacömannachu.»

²⁹ Chaura ray niran: «¿Imatantaj parlashunpis? Chayno captenga

^g 19.16 2Sam. 16.5–13. ^h 19.24 2Sam. 9.1–13; 16.1–4.

Siba chasquishan chacracuna pullan gampaj cachun y pullanna paypaj cachun.»

³⁰ Chaura Mefi-bosetga niran: «Payllapäna llapanpis cacuchun. Nogaga cuntintacö ray palasyonman sänu cutimushallanwanmi.»

³¹ Galaadcho caycaj Rogelim marca runa Barzilaipisⁱ yan'garan rayta Jordán mayuta päsachëshinanpaj. Chayllapitana «Aywallä» nircur cutinun caran. ³² Pay caran auquinna, pusaj chunca (80) watayojna. Fiyupa ricumi caran. Chaymi Mahanaimcho tiyaycashañ wíchan ray Davidtaga yanaparan imata pishêpacuptinpis.

³³ Chaymi rayga Barzilaíta niran: «Jerusalenman aywacushun. Nogami ricacushayqui.»

³⁴ Chaura Barzilai niran: «Tayta, nogaga Jerusalenman manami aywä-mannachu. Ishcay quimsa wata-llanami cawashaj. ³⁵ Pusaj chunca (80) watayojnami cä. Micur upurpis manami gustunta mayänachu. Mananami tantiyänachu warmi ni ollgu cantashantapis. Gamwan aywarga gastullatanachari rurashayqui.

³⁶ Mayuta päsanyquiyajllami yan'gäshayqui. Gamta yanapashäpitaga ¿imapänataj «yanapëshayqui» nimanquipis? ³⁷ Chaypa ruquenga marcäman cuticushaj ari. Wañucur chaychömi papänë pamparashancho pampacushaj. Tayta, nogapa ruquëga wamrä Quimamta pushacuy. Paytana imachöpis yanapaycunqui ari.»

³⁸ Chaura ray niran: «Chaura Quimamta pushacushaj ari. Gam munashayquinömi yanapëshaj. Imatapis mañacamashayquitami goshayquipaj.»

³⁹ Jordán mayuta llapan runacuna chimparan. Raypis chimparan. Barzilaítana muchaycuran «aywallä» nir. Chaura Barzilai marcanman

cuticuran. ⁴⁰ Ray Davidnami Quimamwan iwal Gilgalman aywacuran. Iwal aywacuran Judá runacunapis, pullan Israel runacunapis. ⁴¹ Chaypita llapan Israel runacuna aywaran ray cajman. Aywaycärir niran: «¿Imanirtaj Judá runacunallaga gamta, famillyayquicunata suldäruyquicunata Jordán mayuta päsachishunqui?»

⁴² Chaura Judá runacunaga Israelcunata niran: «Rayga lijítimu castämi. Gamcunaga manami imapitapis rabyanayqui camacanchu. Nogacunaga manami raypa cajllawanchu cawä. Manami charicarcärëchu imantapis.»

⁴³ Israelcunana niran: «Nogacuna rayta charänäga camacan gamcunapita chunca cutipa maspami. Jinachöpis nogacunami cä mayurga. Chayno caycaptëcunaga ¿imanirtaj nogacunata manacajman churarcaycämanqui? Nogacunami rimir-puntataga «rayninchi cutimuchun» nishcäpis.»

Judá runacunami ichanga rima-shanta mas bälíchiran.

Seba Davidpa contran jatarishan

20 ¹ Benjamín casta Bicripa wamran Seba fiyu runa caran. Pay caycaran Gilgalcho. Sebagá runacunata shimita goran Davidta chiquicarcärinanpaj. Shimita goran niran:

«¿Isaípa wamran Davidpa cajmanga ama imamanpis jaticëshunchu!

¿Israelcunaga marcanchüman-cama aywacushun!»^j

² Chaura Israelcunaga Davidta cachaycärir llapan aywacuran. Bicripa wamran Sebatana gaticurcuran. Judá casta cajcuna ichanga Jordán mayupita-pacha asta Jerusalenmana rayninta mana cachaypa yan'garan.

³ Jerusalenman David cutiyorga palasyuta täpaycänanpaj cachashañ

ⁱ 19.31 2Sam. 17.27–29. ^j 20.1 1Rey. 12.16; 2Crón. 10.16.

chunca chinancunata^k juc wasiman tiyachiran. Uywaynincunawan täpachiran. Davidga manana imaypis chay warmicunawanga cacurannachu. Chay warmicunaga shuynillana tiyacuran. Biyüdacunanöllana wañunancama tiyacuran.

⁴Chaypita Amasata ray niran: «Llapan Judá runacunata shuntay. Cananpita quimsa junajta cayman llapayqui shamunqui.» ⁵Chaura Amasa aywaran shuntananpaj. Ichanga diyata jitapashan junajllapaj shuntayta mana atiparanchu.

⁶Chaymi Abisaita David niran: «Sebaga Absalonpita masmi llaquicuyman churamëshun. Chaymi gaticachay caycho caycaj suldäröcunawan. Curalasha siudäcunaman chayashpanga gueshipaycamashwanmi.» ⁷Joabpa suldäruncuna, rayta täpaj Ceret suldärucuna Pelet suldärucuna mas allinin caj acranacarcärir Jerusalenpita Abisaiwan aywaran Sebata gatishpan.

⁸Gatejcunaga carcaycaran Gabaonpa sercan gaga cajcho. Chaycho caycapinmi Amasaga tincunanpaj aywaran. Joabga jatiraycaran pillyananpaj röpanta, sinturunwan sumaj wachcu-sha. Jucaj isquínanchöga cuchillunta charaycaran. Chay cuchillonga shicwacuran. ⁹Joabga derëchu caj maquinwan Amasata shapranpita muchananpaj charishpan tapuran: «¿Allichu purimushcanqui waugui?» nir. ¹⁰Y Amasaga mana cäsupashachu caran Joab cuchillunta aptaraycashanta. Joabga illajpita Amasata pachacho tucsiycuran. Chaura ashashnin llojshicaramuran. Joab manana yaparannachu. Chayllawanna wañucuran. Nircur Joabga wauguin Abisaiwan Bicripa wamran Sebata gatir aywacuran.

¹¹Chaura Joabpa juc suldärunga Amasa jitaraycashanpa lädunman

aywaycur niran: «¡Joabpawan Davidpa faburnincunaga Joabta yanapächun!»

¹²Nänicho pasaypa yawarllana Amasa wañusha jitarapinmi chaypa päsa suldärucuna ichiycur ricaparan. Chayno ichiptinmi chay suldäruga nänipita juc-läman apaycur jacurashanta jorgurir chapaycuran. ¹³Nänpita witircacherga Joabwan llapan aywacuran Sebata gatishpana.

¹⁴Sebaga aywar päasaran llapan Israel tribucuna tiyaycashanpa. Abel-bet-maaca partiman chayaran. Bicripita mirar aywajcunaga chayman shuntacaran. Nircorga siudäman llapan yacuran. ¹⁵Joabwan aywaj runacuna Abel-bet-maaca siudäman chayaycur siudä guepanpa allpata goturan wichänanpaj. Nircorga siudäpa curralninta llapan juchuchiya munaycaran. ¹⁶Illajpita juc sabidu warmi curral jananpita sinchipa gayacuran: «¡Wiyaycallämay! ¡Wiyaycallämay ari! ¡Joabta willaycäriy! ¡Paywanmi parlayta munä!»

¹⁷Joab llojshipapin warmi tapuran: «¿Gamchu Joab canqui?» nir.

Niptin Joab niran: «Au Joabmi cä.»

Chaymi warmiga niran: «Noga nishäta wiyaycamay ari.»

Chaura Joabga «Mä, nimay ari» niran.

¹⁸Niptin warmi niran: «Unay runacunaga nej: ‹Tantiyachicojta tariyta munarga Abel marcapa^l aywachun.› Chay nishannöllami chay marcachöga alli tantiyachicojta pipis tarin. ¹⁹Cay siudächo tiyajcunaga llapanëpis cä pi-maypäpis allillami. Israelcunapa contranga imaypis manami jatarishcächu. Gamga illgächiyta munaycanqui Israelcho mas alli goyäcojtami. ¿Imanirtaj illgächiyta munanqui TAYTA DIOSPA cajtaga?»

²⁰Niptin Joab niran: «¡Ama chaytaga yarpaychu! Nogaga manami yarpächu

^k20.3 2Sam. 16.22. ^l20.18 Abel marcapaj parlarga Abel-bet-maaca marcapämi parlaran.

illgächiyta. ²¹Manami wañuchicuyta-chu ashiycä. Efraín parti runa Sebami ray Davidta chiquircusha. Pilyananpaj runacunata shuntasha. Payllata nogacunataga entregaycamay. Chauraga cay siudäpita aywacushämi.»

Chaura warmiga niran: «Cay perga janarpita umantami jitaparamushayqui.»

²²Chayno nircur warmiga sabidu cayninwan siudächo caycay runacunata tantiyachiran. Chaymi Sebata roguriycärir umallanta jitaparamuran Joabta. Chaura Joabga jinan öra niran «suldärucuna witicunanpäna tuca.» Chaymi siudäman yaucunanpaj carcaycashaño llapan aywacuran wasinman-cama. Joabna Jerusalemman cutiran raywan parlaj.

Davidpa yanapajnincuna

(2Sam. 8.15–18; 1Crón. 18.14–17)

²³Joabga llapan Israel suldärucunata mandaran. Joiadapa wamran Benaiana mandaran rayta täpaj Ceret, Pelet suldärucunata. ²⁴Impuestupita arucejna caran Adoram. Raypa secretaryunna caran Ahiludpa wamran Josafat. ²⁵Seva caran acta isquirbej. Sadocwan Abiatarra caran mandaj cüacunata. ²⁶Jairpita miraj Irapis Davidpa cüran caran.

Gabaón runacuna ayñita cutichishan

21 ¹David ray caycashañ wichan fiyupa muchuy caran quimsa wata intëru. Chaymi Davidga TAYTA DIOSTA tapucuran. TAYTA DIOSNA niran: «Fiyupa muchuy cananpäga Saulmi, familyancunami juchayoj. Paycunami Gabaón runacunata wañuchisha.»

²Chaura Davidga gayachiran Gabaón runacunata. Nircur paycunawan parlaran. (Gabaón runacunaga manami

Israelcunachu caran. Amorreo casta runacuna wallcalla quëdajcunami caran. Paycunawanmi Israelcuna alli goyänanpaj parlacuran.^m Saulga Israelcunapaj, Judäcunapaj allita ruraycashanta yarpar Gabaón runacunata wañuchisha caran.) ³Davidga Gabaón runacunata tapuran: «Castayquicunata wañuchishanpita ¿imanöpataj pägäman TAYTA DIOS acrashan runacunata bindisyunta gonayquipaj? ¿Imatataj gamcunapaj ruräman?» nir.

⁴Chaura Gabaón runacuna niran: «Manami guellay jananchu Saulpa familyancunawanga chiquinacö. Israelcuna wañunantapis manami munächu.»

Niptin David niran: «Gamcuna nimay ari. Munashayquita imatapis rurashaj.»

⁵Chaura paycuna niran: «Saulga ushajpaj illgächimayta munaran. Cay Israelcho jucnayllapis tiyanäta mana munaranchu. ⁶Chay runapita mirajta ganchista entregamay. Chaura nogacunanami TAYTA DIOSPA ñaupancho wañurcacahir guerucunacho turquirächishaj. Chayno wañuchishaj TAYTA DIOS acrashan Saulpa marcan Gabaa-chömi.»

Chaura Davidga «Entregashayquimi» niran. ⁷TAYTA DIOSPA jutinchö auninacur Jonatanwan parlacushanta cumlirmi Gabaón runacuna wañuchinanpaj Mefi-boset-ta David entregayta mana munaranchu. Mefi-bosetga caran Saulpa willcanmi.ⁿ ⁸Ajapa wamran Rizpacho Saulpa wamran-cunata ichanga prësu chariran. Jutin caran jucapja Armoni, jucapjana Mefi-boset. Saulpa wamran Merabcho^o Adrielpa pichgan wamrancunatapis chariran. Adrielga caran Mehola runa Barzilaiapa wamran. ⁹Paycunataga Gabaón runacunata entregaycuran. Chaura TAYTA DIOSPA ñaupancho

^m21.2 Jos. 9.3–15. ⁿ21.7 1Sam. 20.15–17; 2Sam. 9.1–7. ^o21.8 1Sam. 18.19.

jircacho wañuchiran. Chaychömi ganchisnintin wañuran sebäda cosëcha gallariycashan wichan.

¹⁰Chaura Ajapa wamran Rizpaga llaquicur gachga röpata jaticuran. Nircur juc gaga jananman aywaycur tiyacucuran sebäda cosëcha gallaycushanpita-pacha tamya gallaycunancama. Wañusha caycajcunaman junajpaga ima äbitapis mana yayuchirancho; chacaypapis ima jirca animalcunatapis mana yayuchirancho.

¹¹Saulpa chïnan Rizpa chayno rura-shanta Davidta willaran. ¹²Chaura Davidga aywaran ganchis wañojcunapa cuerpunta y Saulpa Jonatanpa tulluncunata shuntaj. Pamparaycaran Galaadcho caycaj Jabeschömi. Chaycho tiyaj runacunami suwamusha caran Bet-sán läsapita, Filistea runacuna Gilboacho pillyar Saulta wañuycärachir warcushanta.^p ¹³Nircur Davidga apachiran Saulpa Jonatanpa tulluncunata. Ganchista turquishancunatapis shuntachiran. ¹⁴Shuntarcachirname Saulpa y wamran Jonatanpa tulluncunata pampachiran Saulpa taytan Cis pamparashanman. Chayga caran Benjamín tribu runacuna tiyashan Zela marcachömi. Ray David nishannölla llapanta rurapinmi Israel runacunata Tayta Dios yanaparan micuynincuna allina wayunanpaj.

Davidta Abisai salbasha

¹⁵Filistea runacunaga yapay achäquita ashiparan pillyananpaj. Chaymi Davidpis lllapan suldäruncunawan aywaran pillyaj. Pillyaycashancho Davidga fiyupa uticaran. ¹⁶Jatuncaray runa Isbi-benob jutiyoj Davidta wañuycachinanpäna caycaran. Chay runapa lansan caran quimsa quïlu masyarpoj. Cheglanchöpis purichej mushoj sablita. ¹⁷Ichanga Sarviapa

wamran Abisai cörriran Davidta washaj. Mana manchaypa yaycur Filistea runata wañuycachiran. Chaypita suldäruncunaga Davidta niran: «Tayta, nogacunawanga amana pillyaman aywaynachu. Wañuchishuptiquega nogacuna achquiynaj-japuychari quëdäman-llapa.»

Jatusaj runacunawan pillya cashan

(1Crón. 20.4-8)

¹⁸Chaypita yapay Gobcho pillya caran Filistea runacunawan. Chay öra Husat runa Sibecai wañuycachiran Safta. Safga caran jatusaj runacuna castami.

¹⁹Yapaypis Filistea runacunawan pillya caran Gobcho. Belén runa Jairpa wamran Elhanán wañuycachiran Gat runa Goliat-ta. Chay runapa tucsicuna lansanga caran tilarpa bayëta pitucunanno.

²⁰Chaypita yapay Gatcho pillya caran. Chaycho juc runa caran jatuncaray. Dëdun caran ishcaj chunca chuscü (24); cada maquincho sojtacama, chaquincunachöpis sojtacama. Chaypis caran jatusaj runacuna casta. ²¹Chay runaga manacajmanmi churaran Israelcunata. Chaytaga wañuchiran Davidpa wauguin Simeapa wamran Jonatán. ²²Chay chuscun jatusaj runacunaga caran Gat runa Refa castami. Chay runacunataga wañuchiran Davidwan suldäruncunami.

Binsiycur David cantasha

(Sal. 18)

22 ¹Davidtaga TAYTA DIOS salbaran Saül wañuchinanpaj caycaptin, waquin chiquinacushancunapis wañuchinanpaj caycaptin. ²Chaymi Davidga cantar niran: «TAYTA DIOS, gammi gagano chapämajné canqui.

- Gammi pacamaj, salbamaj canqui.
³Tayta Diosnëmi washäcoj gaga, chapacuna escüdö, munayniyoj salbamaj, altunnin pacacunä, altunnin gueshpinä, salbamajnä. ¡Pillyacho salbamashcanqui!
⁴TAYTA DIOS, alabasha canayquimi camacan. Mañacamuptë, chiquimajcunapita salbamanquimi.
⁵«Wañuyga yacu-jinami ñiticarcaran. Juchu-jina janächöna captin fiyupa mancharirä.
⁶Wañuyga wascanömi pitucarcaran. Wañunäpämi togllacunata churapämaran.
⁷Fiyupa llaquicur TAYTA DIOSTA mañacurä. Mañacurä yanapämänapaj. Payga Templunpita wiyamaran. ¡Gaparayparaj mañacushäta wiyamaran!^g
⁸«Chauraga intërucho fiyupa timlur caran. Syëluta tucnarajcunapis sicsicyaran. Tayta Dios rabyacurcuptinmi llapanpis cuyuriran.^r
⁹Senganpita goshtay llojshiyecaran, shiminpitana ushacoj nina. Shiminpaga ajtuycämuran rataycaj shanshata.
¹⁰Syëluta garirir urämuran. ¡Chaquin rurinpana caycaran fiyupa yana pucutay!
¹¹Querubín anjilta muntacurcur buylaran. Wayrachömi aywacuran.^s
¹²Paypa toldonga yanauyaycaj pucutaymi.

- Paypa chucllanga yana chicnu chacaymi.
¹³Fiyupa achicyaycaj illguymi ñaupanpita llojshiran. Ratataycaj shanshami tamyamuran.
¹⁴«Janajcho caycaj TAYTA DIOSGA syëlupita-pachami parlamuran râyuno busninwan.
¹⁵Lëchancunatami jitamuran. Illguynincunatami achicyächiran. Chiquimajcunatapis machiypamachir gueshpichiran.
¹⁶TAYTA DIOS ollgöpaptin, sinchipa pücariptin, lamar rurin alayri ricacäcuran. Munduta tucnarajcunapis alayri ricacaran.^t
¹⁷«Tayta Diosga janajpita-pachami ayparcamusha. Maquinwan jorgamasha maymay lamarpita.
¹⁸Fiyupa munayniyoj chiquimajcunawan pilliyacho captëpis salbamasha. Paycunaga caran nogapita mas callpayojmi.
¹⁹Ñacaycho caycaptëmi paycunaga magamaran. Chaypis TAYTA DIOSGA yanapämaran.
²⁰Paymi alliman jorgamaran. Cuyamashpanmi salbamaran.
²¹Allillata rurashäpitami TAYTA DIOSGA salbamasha.
²²Nogaga TAYTA DIOS munashannöllami goyaycä. Juchata mana ruraypami imaypis gatarashcä.
²³Mandamintuncunataga llapan-tami musyaycä. Laynincunataga imaypis cumlishcämi.

^g22.7 Sal. 120.1; Jon. 2.2. ^r22.8–17 Jue. 5.4–5; Job 36.30; Sal. 29.3–9; 77.16–19; 144.5–8; Hab. 3.3–13. ^s22.11 Sal. 68.33; 104.3. ^t22.14–16 Éxo. 15.8; 19.19.

- ²⁴ Payga musyanmi munashanno
cawashäta.
Manami imatapis llutancunata
rurashcächu.
- ²⁵ Allillata rurashäpitami
TAYTA DIOSGA premyuta gomasha.
- ²⁶ «Tayta Dios, cuyapäcoj cajtaga
yanapanquimi.
Alli cajcunatapis yanapanquimi.
- ²⁷ Juchaynajcunatapis yanapanquimi.
Fiyu cajcunatami ichanga casti-
ganqui.
- ²⁸ Umildicunataga salbanquimi.
Alli-tucojuncunatami ichanga
manacajman churanqui.
- ²⁹ TAYTA DIOS, gammi achicyaj
pachata ricaycächimanqui.
Chacaj pachacho ricacunätapis
gammi cawaycächimanqui.
- ³⁰ Gam yanapämaptiquimi chiqui-
majcunata magaj yaycushaj.
Siudänincunata curalaraycaj
jananpapis yaycurishaj.
- ³¹ «TAYTA DIOS nishanga llapanpis
allimi.
Tayta Diosga aunishanta llapan-
tapis cumlinmi.
Diosga yärajcunata washanmi.»^u
- ³² TAYTA DIOSPITA mas jucga
manami canchu.
Paynöga manami pipis washä-
mashwanchu.»^v
- ³³ Tayta Diosmi fiyupa munayniyoj
pacacunäga.
Ima rurashäcunatapis alli llojshi-
chin.
- ³⁴ Paymi chaquätapis apurä japa-
chin lluychupatanöraj.»^w
Paymi altu jircacunachöpis mana
manchacuypa cachiman.
- ³⁵ Paymi pillyapäpis yachachiman.
Paymi callpata goman runsipita
lëcha illapacunata chutanä-
päpis.
- ³⁶ Gammi chapämanqui, salbaman-
qui.
Cuyapäcoj cayniquiwanmi alli-
man churamashcanqui.
- ³⁷ Gammi alli purichimashcanqui.
Chaymi mana lluchcacashcächu.
- ³⁸ «Chiquimajcunatapis gatica-
chashcä, illgächishcä.
Llapanta ushaycur-rämi cuti-
mushcäpis.
- ³⁹ Ushajpämi ushashcä.
Binsiptë ñaupämanmi tuniran.
Nircur manami jatarishanachu.
- ⁴⁰ Gammi guërracho pillyanäpaj
callpata gomashcanqui.
Gammi conträcunata binsinäpaj
munaynëman churamushcan-
qui.
- ⁴¹ Binsinäpaj yanapämaptiquimi
cuncapita lluchcashcä.
Chaynöpami chiquimajcunata
llapanta ushacächishcä.
- ⁴² «Yanapämaj» niptinpis manami
pipis yanapashachu.
TAYTA DIOSTA mañacuptinpis
manami yanapashachu.
- ⁴³ Ñüchu allpatanömi rurarirä.
Cällicunacho mitu caycajtänömi
lluchcar-ushashcäpis.
- ⁴⁴ Runacuna conträ jatariptinpis
salbamashcanqui.
Nasyuncunapa mandajnin canä-
pämi churamashcanqui.
Cananga jäpa runacunami sirbi-
manpis.
- ⁴⁵ Chay runacunaga nishäta llapan-
tami wiyacun.
Jäpa runacunami rispitanman.
- ⁴⁶ Juc-lä nasyun runacunaga
manchacamanmi.
Pacacunanpitapis sicsicyaycarmi
llojshimun.
- ⁴⁷ «¡Alabasha cachun TAYTA DIOS!
¡Alabasha cachun chapämajnäga!

^u 22.31 Prov. 30.5. ^v 22.32 Isa. 44.8. ^w 22.34 Hab. 3.19.

¡Fiyupa rispítasha cachun salbama-
maj Tayta Diosnëga!

⁴⁸Mana allita ruramashanpita Tayta
Diosmi ayñita cutichisha.

Llapan runacunatapis munayni-
lläman churasha.

⁴⁹Chiquimajcuna fiyupa rabyasha
caycaptinpis,
mana wiyacojcuna nogapa conträ
jatariptinpis Paymi salbaman.

¡Tayta Dios gammi salbamanqui
fiyu runacunapita!

⁵⁰Chaymi llapan nasyuncunapa
läduncho alabashayqui.

Cantaypapis alabashayquimi
TAYTA DIOS.^x

⁵¹Sumaj allichico cananpämi yana-
panqui acrashayqui raytaga.
Imaypapis allimi ricanqui Davidta,
paypita mirar aywajcunata.»

Ushanantana David rimashan

23 ¹Ushanantana David rimaran.
Isaipa wamranmi caran
Davidga.

Paytami Tayta Diosga alliman
churar munayniyojyächiran.

Paytaga Jacobpa Diosninmi acra-
ran ray cananpaj.

Israelcunacho payga caran alli
cantajmi:

²«Nogataga TAYTA DIOSPA Espiri-
tunmi rimaycächiman.

Pay yarpashancunatami rimä.

³Israelcunapa Diosninmi parlasha.
Israelcunata washajmi nimasha:

«Runacunata mandashpan alli
arriglëga,

Tayta Diosta manchacuypa
mandëga

⁴canga pacha waraptin rama-rama
achicyaycaino,

tamyariptin gwewacunata wiña-
chinanpaj lliuyaraycaptin
tutapa inti ratamojno.»

⁵Nogapita mirar aywajcunataga
Tayta Dios manami cachay-
congachu.

Imaycunapisi yanapämënanpämi
aunimasha.

Sumajmi parlashcäcuna.

Manami rucacangachu.

Paymi imapitapis alliman jorga-
man.

Yarpashäcuna alli llojshinanpaj
camacächin.

⁶Mana alli rurajcunaga cashacu-
nano jitarisha canallanpämi
caycan.

Cashacunata jogariptinchi tucshi-
mashanchinömi paycunapis
mana allita ruramanchi.

⁷Chaycunata yatananpäga charin
fyërruta u lansatarämi.

Nircurmi ninaman gaycupaycun
ushajpaj rupanapaj.»

**Davidpa mas mijurnin caj
suldäruncuna**

(1Crón. 11.10–47)

⁸Davidpa mas mijurnin caj suldä-
runcuna quimsami caran. Rimir cajmi
caran Hacmonipa wamran Joseb-base-
bet. Paymi caran chay quimsa suldä-
runcunapa capitannin. Juc cutichömi
Joseb-basebetga lansanwan wañuchi-
ran pusaj pachac (800) suldäruncunata.

⁹Paypa guepanmanna caran
Ahohi runa Dodupa wamran Elea-
zar. Paywanga quimsajmi caran
jinyu pillyajcuna. Pasdämimchöpis
Davidwan iwal caycaran. Filistea
runacuna pillyananpaj shuntacaptin
Israelcuna gueshpiran. ¹⁰Eleazarmi
ichanga mana manchaypa ichiparan.
Filistea runacunata wañuchiran asta
maquinpis uticänancama. Maquinpis
uticayllawanna aptacäcuran. Sablita
mana caccharirannachu. Chay junëga
TAYTA DIOSMI binsichiran. Chaypi-
tarämi llapan suldäruncuna Eleazarpa

guepantana aywaran chiquishancunapa ima-aycantapis charicuncunapaj.

¹¹ Eleazarpa guepanmanna caran Arar runa Aguepa wamran Sama. Lehicho Filistea runacuna shuntacaran pushpu mururaycashan chacrachochaura Israelcunaga gueshpír aywacuran. ¹² Sama ichanga pullan pampaman ichicucuran. Filistea runacunata wañuchiran Israelcunata washashpan. Chaynömi TAYTA DIOSGA binsichiran.

¹³ Israelcunacho caran quimsa chunca (30) jinyu pilyajcuna. Paycunapitami cosëcha wichan quimsaj aywaran Davidwan tincoj Adulama machayman. Filistea suldärunagana Refaim pampacho pachacaraycaran. ¹⁴ Davidga caycaran pacacunancho. Chay öra juc röpa Filistea suldärunagana caycaran Belencho. ¹⁵ Davidga rimarcuran: «¡Belén marcapa puncun yajcunacho caycaj yacuta pillaraj macaycamanman upurcunäpaj!» nir.

¹⁶ Chaura quimsaj baluryojcunaga Filistea runacuna pachacaraycashanman yajcuran. Belenman yajcunachocaycaj pösüpita yacuta jorgurcur Davidta apaparan. Chaura payga upuyta mana munaranchu. Chaypa ruqin TAYTA DIOSPAJ pampaman jicharan ¹⁷ «¡Upunätaga TAYTA DIOS- PIS ama munachunchu! Uporga cay runacunapa yawarninta upojnöchari caycäman. Paycunaga wañuytapis mana mancharmi aywasha apamunanpaj,» nir. Chayno nirmi upuyta mana munaranchu.

Chaytaga ruraran quimsa chuncapita (30) quimsaj baluryojcunami.

¹⁸ Joabpa wauguin Abisai Sarviapa wamranga caran quimsa chunca (30) imatapis mana manchaypa pilyajcunapa mandajnin. Paymi juc cuticho quimsa pachac (300) runacunata tucsicuna lansanwan wañucachiran. Chaynöpami quimsa chunca (30) cajcunapita mas rejsisha caran.

¹⁹ Mas rispitasha caran quimsa chunca (30) cajpitaga. Chaynöpami paycunapa mandajnin cananpaj churaran. Ichanga manami ayparanchu quimsaj mas mijurcunamanga.

²⁰ Cabseel runa Joiadapa wamran Benaía caran jinyu. Paymi achca cuti pilyacho fiyupa almiraypajcunata ruraran. Moab runa Arielpa ishcan wamrancunatapis wañucachiran. Juc cutichöpis rashtaycaptin uchcuman yajcuran. Chaycho juc liyunta wañuchiran. ²¹ Jatuncaray Egipto runatapis wañuchiran. Egipto runaga tucsicuna lansayoj caran. Benaíaga guerullanmi ichiparan. Nircorga lansanta guechurcur tucsijcunan. ²² Joiadapa wamran Benaíaga chaynöpami quimsa chuncapita (30) mas rispitasha caran.

²³ Waquinpita mas imatapis chasquiran. Chaypis manami ayparanchu quimsaj mas mijurcunamanga. Paytaga David churaran quiquinta täpaj suldärunagana mandajnin cananpaj.

²⁴ Quimsa chunca (30) jinyucunaga caran:

Joabpa wauguin Asael,
Belén runa Dodupa wamran Elhanán,

²⁵ Harod runa Sama,

Harod runa Elica,

²⁶ Palti runa Heles,

Tecoa runa Iquespa wamran Ira,

²⁷ Anatot runa Abiezer,

Husah runa Sibecai,

²⁸ Ahohi runa Salmón,

Netofa runa Maharai,

²⁹ Netofa runa Baanapa wamran

Heled,

Benjamín particho caycaj Gabaa runa Ribaipa wamran Itai,

³⁰ Piratón runa Benaía,

Gaas ragrapa yacu aywajpita Hidai,

³¹ Arba runa Abi-albon,

Bahurim runa Azmavet,

³² Saalbón runa Eliaba,

Jasenpa wamrancuna;

Jonatán;

³³ Arar runa Samapa wamran
Jonatán;

Arar runa Sararpa wamran
Ahíam;

³⁴ Maaca runa Ahasbaipa wamran
Elifelet,
Gilo runa Ahitofelpa wamran
Eliam,

³⁵ Carmel runa Hezrai,
Arab runa Paarai,

³⁶ Soba runa Natanpa wamran Igal,
Gat runa Bani,

³⁷ Amón runa Selec,
Beerot runa Naharai (Payga
caran Sarviapa wamran Joabta
cuydaj),

³⁸ Jatir runa Ira,
Jatir runa Gareb,

³⁹ Het runa Urías.

Llapanga caran quimsa chunca
ganchiswan (37).

Runacunata David sinsuchishan

(1Crón. 21.1–17)

24 ¹Chaypitana TAYTA DIOS
yapay Israelcunapaj rabyacur-
curan. Chaymi camacächiran Israelcun-
atawan Judäcunata David sinsunan-
paj. ²Chaura rayga lllapan suldärucu-
napa mandajnin Joabta niran: «Ayway
tumamunqui lllapan triübu Israelcuna
tiyaycashanpa Danpita-pacha Beer-
sebacama. Llapanta sinsumunqui ayca
runacuna cashantapis musyanäpaj.»

³Joabga rayta niran: «TAYTA DIOS-
NIQUEGA runacunata yapacächichun
canan caycashanpitaga pachac cutipa
masta. Chayno gampis caway aypalla-
man mirashata ricanayquipaj. Ichanga
¿imapätaj munanqui lllapan runacu-
nata sinsuchiya?»

⁴Chaypis Joabga waquin mandaj-
cunaga ray David nishantami wiya-
curan. Chaymi Joabwan suldärucu-
napa mandajninacunaga aywacuran
raypa ñaupanpita Israelcunata sinsoj.

⁵Jordán mayuta päsarcur sinsur
gallaycuran Aroer marcacho tiyaj
runacunata y Arnón ragracho caycaj
marca runacunatapis. Chaypitanami
Gad triübu runacuna tiyashan partipa
sinsuraycar päasaran asta Jazer marca-
cama. ⁶Chaypitana Galaad partipa y
Het runacuna tiyashan Cades marca-
cama. ⁷Chaypitana sumaj curalasha
Tiro siudäpa. ⁸Chaypitana Hev runacuna y
Cananeo runacuna tiyashan siudäcu-
napa sinsuraycar päasaran. Nircurmi
Judá triübu runacuna tiyashan sur
caj-läpa sinsuraycar päasaran asta
Beerseba siudäcama. ⁹Intëru nasyunta
tumaran isgun quilla ishcaj chunca
(20) junajnin. Intëruta tumaycur Jeru-
salenman cutiran. ¹⁰Sinumushanta
Joabga rayta willaran. Israelcunacho
caran pusaj pachac waranga (800,000)
runa pillyapaj alli cajcunalla; pichga
pachac warangana (500,000) Judá
cajcho.

¹⁰Lllapan runata sinsuraycachir
Davidga «juchatami ruraschá» niran.
Chaymi TAYTA DIOSTA mañacur niran:
«Fiyupa juchatami ruraschá sinsucherga.
Cananga perdonaycallämay ari TAYTA
DIOS. Nogaga upa runanömi ruraschá.»

¹¹Warannin tutaga puñushanpita
David jatariranna. TAYTA DIOSGA
profëta Gadta (payga caran Davidpa
musyapacojnin) niran: ¹²«Ayway
David cajman. Quimsa castata rurayta
yarpaycashäta willanqui. Payga acra-
chun maygantapis munashan cajta.»

¹³Chaymi Gadga David cajman
aywaycur tapuran: «¿Imatataj munan-
qui? ¿Cay nasyuncho ganchis wata
muchuy canantachu? ¿Chiquishojcuna
quimsa quilla gaticachäshunayqui-
tachu? ¿Quimsa junaj fiyu gueshya
canantachu? Mä yarpachacuy. Sumaj
yarpachacurcur willamay nogapis
cachamajta willanäpaj.»

¹⁴Chaura Davidga Gadta niran: «Cananga imata niytipis manami puydëchu. Mas alli canman TAYTA DIOS munashanno ruramashami. Payga fiyupa cuyapäcojmi. Manami munächu runacunapa maquincho ñacaytaga.»

¹⁵Chaura chay tutalla gallaycur Danpita Beersebacama intëru Israel nasyonman fiyu gueshyata TAYTA DIOS yurichimuran. Chay gueshyawanmi ganchis chunca waranga (70,000) runacuna wañuran. ¹⁶Jerusalencho tiyajcunata anjil ushacächinanpaj caycaptinna TAYTA DIOS pësacuran. Chaymi wañuycächej anjiltaga niran: «Amana mastaga wañuchiynachu.»


Chay öra TAYTA DIOSPA anjilnenga caycaran Jebús runa Araunapa éran janancho. ¹⁷Wañuchicoj anjilta ricaycurmi TAYTA DIOSTA David niran:

«¡Nogami juchataga rurashcä! Runacunaga imatapis rurashatächu. ¡Castiguga nogata, familyäcunata chayamächun ari!»

Altarta David rurashan

(1Crón. 21.18–27)

¹⁸Chay junajlla Gad aywaran Davidman. Chayaycur niran «Jebús runa



Altarta David rurashan (2Sam. 24.18)

Arauna riguta éraycashancho altarta TAYTA DIOSPAJ ruray.» ¹⁹Chaymi Davidga aywaran TAYTA DIOS willachishanno. ²⁰Araunaga carullamanna ricaran ray yanapajncunawan aywaycajta. Chaymi Araunaga tariparan. Rayta rispítashpan ñaupánman gongurpar umpuran. ²¹Nircur niran: «¿Imallaraj caycan tayta watucamä-nayquipaj?»

Chaura David niran: «Rígu éra-shayqui chacrayquita ranticaycamay. Chaychömi fiyu gueshya chawanánpaj TAYTA DIOSPAJ juc altarta rurashaj.»

²²Chaura Arauna niran: «Tayta, maynintapis munashayquita chariy ari. Chaycho uywacunata rupachiy Tayta Diospaj. Törucunapis caycanmi rupachina sacrificisyupaj. Caycanmi jorquëticunapis, yügucunapis yantapaj. ²³¡Chaycunataga llapanta gamtami goycö tayta!» Mastapis Arauna niran: «¡TAYTA DIOSNIQUI cuyapaycushunqui ari!»

²⁴Chaura rayga niran: «Manami tayta. Llapantapis rantiypami ranticamanqui risyuncho. TAYTA DIOS-NËPÄGA manami rupachishächu dibaldilla tarishäta.»

Davidga chaynöpami chay partita rantiran töruntinta pichga chunca (50) guellaycho. ²⁵Chaychömi juc altarta TAYTA DIOSPAJ ruraran. Nircur rupachina sacrificisyucunata y alli goyaypita sacrificisyucunatapis rupachiran. Chayno ruraycuptin mañacur ruwacushanta TAYTA DIOS wiyaran. Chay örami acrashan runacunapita fiyu gueshya aywacuran.